

**EKALESIA FAAPOTOPOTOGA KERISIANO
SAMOA**

**TUSI MO FAIA'OGA O A'OGA ASO SA
*SUNDAY SCHOOL TEACHERS TEXTBOOK***

2 0 2 3



VASEGA MATUTUA FAAPITOA

**MATAGALUEGA O A'OA'OGA KERISIANO
*DEPARTMENT OF CHRISTIAN EDUCATION***

**EKALESIA FAAPOTOPOGA KERISIANO SAMOA
CONGREGATIONAL CHRISTIAN CHURCH SAMOA**

**TUSI MO FAIA'OGA O A'OGA ASO SA
SUNDAY SCHOOL TEACHERS TEXTBOOK**

2023



**VASEGA MATUTUA FAAPITOA
SENIOR CLASS
(14 – 16 tausaga)**

**MATAGALUEGA O A'OA'OGA KERISIANO
DEPARTMENT OF CHRISTIAN EDUCATION**

UPU TOMUA

E mua'i faatalofa ma faafeiloai atu i le paia tele o le Ekalesia Faapotopotoga Kerisiano Samoa i ona tulaga faalupeina, i le Suafa pele o Iesu Keriso lo tatou Taitai Sili. Ua faamalo le soifua manuia ia outou susuga i Toeaina, susuga i Faafeagaiga, Faifeau, A'oa'o ma Faletua, tainane foi afioga i Tiakono, susuga i alii ma tamaitai Faiaoga o tatou Aoga Aso Sa, faapea foi peresetene ma taitai o tatou Autalavou. Ia viia lo tatou Alii, i la outou molimau atu, o fita i tuga ai mo le Alii ma le Tala Lelei, e ala atu i mataupu a le Aoga Aso Sa ma Autalavou.

Ua tatou talitonu, o le Tusi Paia o le Upu a le Atua mo tagata uma, ma ua i ai i totonusi vaega uma ua tatou naunau ia iloa, ina ia tumau mausali pea lo tatou sootaga lelei ma le Atua, ma ia tatou ola ai i le ala tatau e tusa ma lona finagalo. O le mea lea ua tatou talitonu ai, i le matuā taua o le a'oa'oina tatau o fanau laiti ma talavou mai le Tusi Paia. E ao ina a'oa'oina atu ma le faautauta lelei, le uiga moni o vaega o le Tusi Paia ua fia a'oa'oina atu, i se auala talafeagai e tusa ma le matutua ua i ai tamaiti.

1. O le Tusi o Aoga Aso Sa ma Autalavou, ua saunia lava faapitoa mo Aoga Aso Sa ma Autalavou a le Ekalesia Faapotopotoga Kerisiano Samoa. O lona uiga o le meatotino lava a le EFKS, e le faatagaina faaletulafono ona toe lomia e se tasi, e aunoa ma le faatagaga a le Ekalesia. O lea e fautuaina ai foi le Aufaigaluega, o faiaoga o Aoga Aso Sa ma Taitai o Autalavou, i le taua o le teu faalelei pea o Tusi Aoga, e toe saili i ai mo se fesoasoani pe a moomia.

2. O Mataupu o Tusi Aoga Aso Sa ma Autalavou 2023, ua maua lea i le upega Tafailagi (website) a le EFKS; www.cccs.org.ws. Faamolemole ia fesootai mai lo tatou Ofisa i Mulinuu mo se fesoasoani, ma nisi vaega e fia malamalamā i ai, i le telefoni 24340, po o le e-meli-extneduc@cccs.org.ws.
3. Ua lē o toe fa'aalia i le faasologa o Mataupu i Aso Sa taitasi, vaega masani o le a'oa'oina o mataupu, e pei o le Tatalo Amata, Faafeiloai le vasega, faamanatu mataupu talu ai, tatalo e faapaia ai le sene ma le Tatalo Faaieu. Peitai o vaega masani nei e tatau lava ona fai i Mataupu o Aso Sa taitasi. Ua tuuina atu i Tusi Aoga Aso Sa a le Vasega Amata, Vasega Laiti, ma le Vasega Feololo, fati o pese (nota) fou mo nisi o mataupu.
4. Mo le silafia e Tamā o le Ekalesia ma le aufaigaluega faifeau, e i ai le taimi e toe saili mai ai e lo outou mamalu le ofisa o le MAK, mo nisi Tusi Aoga. Peitai, ua māua e le ofisa nei, o nisi tagata, e lē o ni tagata lotu iā tatou, auā latou te leiloa le suafa o lana faifeau. O lea e tatalo atu ai, o le a lē toe taliaina ni tagata faapea e omai i ni Tusi, sei vagana faafeagaiga ma ē omai ma se faamaoniga mai lana faifeau. E lē mafai foi ona faamatuu atu ni Tusi Aoga i nisi o la matou aufaigaluega e aunoa ma se faamaoniga mai le faifeau.
5. Afai ua i ai se lapē i le galuega nei, e matua atu i la outou tofā faale-Atua e magalo ai le aufaigaluega vaivai. Pe afai foi e i ai ni fautuaga taua mo le faaleleia atili o le galuega, faamolemole fesoota'i mai lo tatou Ofisa i tuatasī o i luga, pe lafo mai i le Pusa meli 163, Apia.

6. Ua saunia le Tusi Aoga mo le Vasega Matutua Faapitoa e le susuga ia Peteru Seiuli FS, Ietitaia Solipo FS ma Oli Levi FS.

Ia faamanuia le Atua i le galuega o lenei tausaga, auā le a'oa'oina o alo ma fanau a le Eklesia, ina ia tutupu a'e ma le fiafia e faitau le Tusi Paia ma ola matata'u i le Atua.

Soifua ma ia manuia
O la outou auauna

Maleifua Tanielu
(Faatonu A'oa'oga Kerisiano)

VASEGA MATUTUA FAAPITOA
AUVI TUSI AOGA ASO SA 2023

MANATU AOAO: IA AVEA LE ATUA MA
TAIALA I LE OLAGA

MANATU TAIALA OIANUARI – MATI:
TAUTUANĀ LE FEAU

E le o faatonua le tofā ma le faautautaga loloto i le paia o lo tatou aiga faiaoga;; a'e ua na o se faava'a faalauaitele mo tatou uma, o ē ua valaauna mo lenei galuega taua; "O le aoao atu o fanau: Auā o la tatou feau lea mai le Atua e fai; (Teuterenome 6: 6 – 9) Aoai fanau, tautala soo i ai i mea ua tatou iloa e uiga i le Atua; O le faavae e mautū ma taunu lelei ai la tatou malaga faa-le-a'oa'oga o lenei tausaga 2023.

Ianuari

29 O le ala i le fiafia Isaia 35: 1 – 10
(Aso Sa Tupulaga)

Fepuari

5 O le mea sili o finagalo ai le Alii Mataio 17: 1 – 9
12 O le taiala tuufaasolo mo fanau Teuterenome 6: 4 -
9
19 O le Talalelei mai le nuanua Kenese 9: 8 – 17
26 Ia sa'o la tatou faamuamua Mareko 2: 1 – 12

Mati

5	Iloa tau ma lou lava Koliata	1 Samuelu 17: 31 –
51	O le iloa lelei o Iesu, e taitaiina ai i le salamo	Mareko 14: 66 – 72
12	Olioli i le Alii e le aunoa	Sapakuka 3: 16 –
19	O le pule aoao a le Atua	Mataio 10: 26 – 31
19		
26		

MANATU TAIALA APERILA – ME:
TUMAU I LE VAA E OLA AI

O le lapataiga faalauaitele mo tagata folau uma i le vasa tele, aua o le vaa, o le malu ma le apitaga o tagata i le sami. E le sao se isi e oso ese i le sami mai le vaa. E faapena la tatou folauga o fai nei i le ola, e malu ma sao tatou uma, pe a 'aua le oese ma le Atua, ae tatou tutumau ia te Ia.

Aperila

2	Valaauna e ave Iesu i taimi uma	Mataio 21: 1 – 11
9	'Aua tou te matata'u	Mataio 28: 1 – 10
16	Toe foi i le ala sa'o	Ioane 21: 1 – 14
23	Ia aofia ai ma e e le o faitaulia	Luka 5: 17 – 26
30	E tele itu tino ae tasi le tino	1 Korinito 12: 12 –
26		

Me

7	O faaosoosoga o Iesu	Mataio 4: 1 – 11
14	O le lototele e lu’itau ai (Aso Sa o Tinā)	Mareko 5: 25 – 34
28	O faatasi pea ma Iesu i taimi uma	Mataio 14: 22 – 32

MANATU TAIALA O IUNI:

E PULE AOAO LE ATUA I
TOFIGA

E i ai le talitonuga, o lo tatou ola e pule aoao ai le Atua, e oo lava i lona fa’aaogaina i tiute ma faiva eseese. O tofiga lava ua ia tapena mo le manuia o lana fanau. E faapena i tatou le fanau, ia tuu lo tatou ola e pule ai le Atua i lona fa’aaogaina ma ia o faatasi ma la tatou tatalo ina ia tatou malamalama i lana faasinoga mo i tatou.

Iuni

4	O le vaai faa-le-tagata	1 Samuelu 8:9-22
11:	Malamalama o suiga	Galuega 9: 1 – 6
18	O ai ea ou te auina atu	Isasia 6: 1 -8
25	E taua le tatalo	1 Samuelu 1: 8 - 15

MANATU TAIAIA O IULAI: O LE ATUA FAIMALAGA

Malo le onosai ia te outou le fanau i lenei taeao fou. Ua tatou aulia i le manuia le masina lona 7 o lenei tausaga. O le soifuaga o lo o outou soifua ma tatou ola ai e mafai ona faatusaina o se malaga, e eseese mea e tutupu ai i lea aso ma lea aso o lo tatou ola, tatou te ui i manuia, e tau foi la tatou folauga i faafitauli. O a lava mea e tutupu ‘aua nei galo ia te i tatou le fanau, e le

tuulafoaiina i tatou e le Atua o lo o tatou faimalaga faatasi ma ia.

Iulai

2	Ua tiliola Elia	1 Tupu 19: 9 – 18
9	O le alofa e sili i mea uma	1 Korinito 13: 1 – 3
16	Pese o le manumalo	Esoto 15: 1 – 6
23	Ia fai se malologa	Mareko 6: 30 – 32
30	O le malaia o Aikupito	Isaia 19: 4 – 10

MANATU TAIALA O AOKUSO:

PUAPUAGA, FAAMOE MOE

E i ai le fuaitau tamaiti e masani ai Samoa, “e tuaoi afa ma maninoa.” O lona uiga po o le a lava le tigaina ma le mafatia i suiga louloua o le tau po o se afa foi, e mautinoa lava e mavae ae togo ane foliga matagofie ma lagi lelei o le aso e soso’o ai. E faatusa faapena le savaliga faale-faatuatua, e ui i fitā ma puapuaga, peitai, o tua atu o na faigata o lo o taoto ai manuia o le tagata e tumau le faatuatua i le Atua.

Aokuso

6	Apa vai ma le ie soloi	Ioane 13: 4-5, 12-
17		
13	Leoleo mamoe lelei (Aso Sa o Tamā)	Salamo 23
20	Tumau i le Atua	1 Samuelu 17: 41-
47		
27	O le fafine Eleni	Mareko 7: 24 - 30

MANATU TAIALA O SETEMA:

O LE TALA LELEI I LE ALOFA TUNOA O LE ATUA

O le Tala Lelei i le alofa tunoa o le Atua, o le tala lava na afua mai i le amataga o le foafoaga aoao. Na matua manino mai lava lea alofa tunoa, ina ua soloi esea e le Atua o mea uma ua i ai le ola i le lolo, ma ua agasala tagata uma, ma ia toe faia ai se amataga fou, e ala ia Noa ma lona aiga ma mea na faasaoina e le Atua mai le lolo. E foliga mai, faatoa atoatoa le Tala Lelei i le Feagaiga Fou ma ua liutino tagata le Atua e ala ia Iesu Keriso, ina ua maliu ma toetu mai le oti ma le tuugamau, ina ua mafai ona soloi esea agasala a tagata uma.

Setema

3	O le lupe o le ulua'i ave feau o le Tala Lelei	Kenese 8: 1 - 22
10	Luitau faigata	Mataio 16: 24 – 26
17	O le Tala Lelei a agelu	Kenese 18: 9 – 16
24	O mea matagofie	Kalatia 5: 22 – 26

MANATU TAIALA O OKETOPA: O FANAU O LE TAUIMAI LE ATUA

Ia a'oa'oina fanau, o lo latou fananau mai i le lalolagi, o le taui i latou mai le Atua, mo latou matua. Ia a'oa'oina foi ia ava ma alolofa i o latou matua ia toe faamanatu i ai le tulafono e 5. Ia ava i tamā ma tinā e faalevaleva ai o latou aso i le lalolagi nei.

Oketopa

1	Tapenaga o le Lotu Tamaiti
8	Lotu Tamaiti

15	Malologa
22	Ataata ua fanau mai le tama Kenese 21: 1 – 7
29	O le loto o le tamaitiiti Mataio 18: 1 – 4

MANATU TAIALA O NOVEMA: OLA OSITAULAGA

Ia malamalama le fanau, o le ola ositaulaga, ua le na o mea e te ofoina atu i le galuega a le Atua, a o le ola e faatino ai mea lelei uma i lou olaga e pei ona finagalo ai le Atua tatou te faia.

Novema

5	Amio lelei ua puapuagaina	Kenese 39: 1 – 20
12	Taulealea talavou i Ketesemane	Mareko 14: 43–
52		
19	Ia foi i le Atua	Malaki 3: 7 – 12
26	Fa'aaoga tatau le ola talavou	Failauga 12: 1 – 8

MANATU TAIALA O TESEMA: O LE ATUA UA LIUTINO TAGATA E ALA I LE PEPE KERISIMASI

Ia iloa ma malamalama le fanau, o le vaitau lenei e ta'ua o le Kerisimasi. Ua faamanatuina le aso na soifua ai Iesu Keriso i le lalolagi. Ia malamalama foi le fanau, o le fanau mai o le Pepe Kerisimasi o le Atua lava lea ua liutino tagata ma afio mai i le lalolagi, o le atoaga lea o lona Alofa Tunoa ua tino mai.

Tesema

3	O le a tino mai le malo o le Atua	Isaia 9: 1 - 7
10	Ua liutino tagata le Atua	Ioane 1: 1 - 5

VASEGA MATUTUA FAAPITOA 2023

MANATU TAIALA O IANUARI – MATI: TAUTUANĀ LE FEAU

E le o faatonua le tofā ma le faautautaga loloto i le paia o lo tatou aiga faiaoga; a'e ua na o se faava'a faalauaitele mo tatou uma, o ē ua valaauna mo lenei galuega taua; "O le aoao atu o fanau: Auā o la tatou feau lea mai le Atua e fai; (Teuterenome 6: 6 – 9) Aoai fanau, tautala soo i ai i mea ua tatou iloa e uiga i le Atua; O le faavae e mautū ma taunu lelei ai la tatou malaga faa-le-a'oa'oga o lenei tausaga 2023.

ASO SA: *29 IANUARI 2023*

MATAUPU: *O LE ALA I LE FIAFIA*

SINI: Ia a'oa'o tamaiti o le vsega ina ia malamalama lelei, o le Atua, o le ala filemu lava lena ma le fiafia.

TUSI FAITAU: Isaia 35: 1 – 10

FESOOASOANI MO FAIAOGA:

O le ola o fai nei, o se savaliga e umi, ae le o taimi uma o le savaliga e taugamalie. E faapena le olaga o le nuu o Israel; E lutia pea i le tele o faigata ma lailoa ai, ona o le lē mausali o ō latou loto i le Atua. A o le Atua ma lana faamasinoga amiontonu, e lē lavea'iina ai se tagata e fiafia pea e fai le sesē ma le agasala.

O la tatou tusi faitau o lenei taeao, o le valoaga a le Perofeta o Isaia fai mai; "O le a oo mai le taimi sili ona fiafia, ma olioli ai le nuu; pe a o'o ina tafieseae le agasala mai le nuu, ma alolofa moni tagata i le Alii, e ala i le salamō ma liliu mai ia te Ia." Auā o le faamasinoga tonu ma le Alofa a le Atua, e iloa ina ua inoino tagata i le agasala, ma tafieseae sese uma mai ia te i latou. O le uiga tonu lea o la tatou mataupu o lenei Aso Sa; "O le ala i le fiafia." E le o se ala savali, ae o le olaga sa'o ma tatau ona tausisia ma savalia e tagata, e taunu ai i le fiafia ma le olioli, moni ina ua avea i latou ma tagata ua togiolaina. O le a tauaveina, faamalosia, ma fofo e le Atua le gasegase o lona nuu, ma avatu i ona tagata le olaga taumasuasua, e ala i le loto ua tumau moni, ma atoatoa i le Alii.

O fatiatama'i uma o le a tafieseae e le Alii mai le ala o ona tagata; ina ia avea ma ala laulelei ma saogalemu e savavali ai, ona o le mea lea e moomia e tagata uma. O le taimi mulimuli o le a filemu, ma sagatonu mea uma o le ola. O le a avea Karamelu ma Sarona ma eleele lafulemu, e tulimatai i taimi o le seleselega o fuata, ona o le tele ma le fuafetiitii o le laufanua. E le toe iai ni manu feai, o le a savavali i le "ala sa," na o e ua togiolaina e ui ai. Latou te alalaga foi ma pepese fiafia, ona o se taunuuga e le'i i ai muamua o le a taunu iai; aua o le a avea lo latou nuu ma nuu lelei ma malu puipuia e le Atua.

Tupulaga o tama ma teine, o le olaga foi lea e tatau ona tatou olaina, ma tatou savavali ai ma le fiafia. O le ola mama ma aloalo ese mai le agasala, e taunu manuia ai. O le taulaga faaola foi na ofo mai ai le soifua paia ma le mamā o Iesu, ina ia magalo ma ola mamā tatou uma, e ala i le faatuatua.

Uiga o Upu ma Fuaitau:

- i) f (1) vao lafulafu - Eleele na o le vao tuitui, e le fua mai ai ni fua lelei
Karamelu & Sarona - O vaega eleele, o le nuu, o le a fua tele mai.

- | | | |
|------|-------------------------|--|
| ii) | aila | e le maua i Samoa, ae o le manu tele, vave, e ta'a i atu mauga. |
| iii) | - serapi
- u ma kome | faasino i eleele vevela ma matūtū. o ituaiga vao malō, e aoga e lalaga ai le tele o mea taulima; e pei o le ato kome na tuu ai Mose. |

GALUEGA FAATINO: (Taliga Fesili)

Vaai ma faitau lelei lau Tusi Paia, ona tali mai lea o fesili o tuuina atu i lalo, e tusa o la tatou Mataupu.

- O ai o faasino i ai le upu “latou” o lo o i le laina muamua lava, o le fuaiupu muamua?

Tali: O faasino i tagata o le nuu o le Atua.

- Aisea e olioli ai le vao lafulafua, ma tutupu le tele o mea o taua i le f (1) & (2), ona o i latou o taua?

Tali: E olioli ma tutupu suiga matagofie o taua, ina ua salamō ma toe foi le nuu i le Atua. O le gagana faa-faatusa o aumai ai, le faamanuiaga o le eleele ma foliga olioli lo latou fua mai, pe a lelei tagata ma lē toe agasala.

- O le faaiuga o le f (4) o fai mai, “... e afio mai lava o ia, ma faaola ia te outou.” O le a le taimi e afio mai ai lē o taua o le faaola?

Tali: Taimi e salamo ai le nuu, lafoai le agasala, ae faatuatua tumau i le Atua.

- Aisea e le sēsē ai se malaga vālea e ui i le ala o tau'a o le “ala-sa,” i le f (8)?

Tali: E le sesē, aua pe valea lava i le ta'u a tagata, a'e mautinoa, o tagata o ui ai; o tagata lelei ma sao i luma o le Atua, Auā o lo o tau manino mai lava i le f (8). O le ala lea, e le ui ai se tagata leaga!

5. O ai tagata ia ua togolaina o ta'ua i le f (10)?
 Tali: O tagata ua salamō faamaoni ma ua foi i le Atua i le loto faatuatua.

PESE: 219 “E manuia lava”

A'OA'OGA:

- E filemu ma fiafia ala o le Atua.
 - O le ala sili lava o le Atua.
 - O ala o le Alii, e le ui ai se tagata agasala.
-

ASO SA: **5 FEPUARI 2023**

MATAUPU: **O LE MEA SILI O FINAGALO AI LE ALII**

SINI: Ia a'oa'o tamaiti o le vasega ina ia latou iloa, o le mea sili o finagalo ai le Alii; o le fa'aaogaina o o tatou tagata, ae le o le faamalie o le mea o tatou loto ai.

TUSI FAITAU: Mataio 17: 1 – 8

FESOASOANI MO FAIAOGA:

E i ai lava taimi talafeagai ma tatau, e faataunu ai mea o tatou loto ai; Ae maise pe a silafia e le Alii, o le mea o tatou loto ai, o fai ma fesoasoani e faamafanafanaina ai se loto faanoanoa; pe fai ma fofo o se faafitauli; pe lavea'iina ai se mafatiaga; po o se isi lava itu lelei ma taua.

A o la tatou mataupu o le aso, o taula'i i le mana'o o Peteru o ttau i le f 4. Fai mai Peteru, “Le Alii e, e lelei ona ua tatou iinei; a e finagalo i ai, ou te faia iinei ni fale apitaga se tolu; mo oe ma i laua ua fa'aali mai ia i latou.” E lei faatagaina e Iesu le manao e fai, auā e lei faia ni fale. O le fuafuaga a le Alii, e le o le faamalie o le mea e manao i ai Peteru, a o i ai le feau mo ia ma isi e to'alua (Ioane & Iakopo) e tatau ona o e fai, Mataio 28: 19; auā o le fatu lea o le galuega faa-so'o, o le faatalaleiina o le lalolagi. O le siufogfa foi mai le ao e tatau ona usitai; “... ia outou faalogo ia te Ia.”

O le fetaulaiga o manaoga eseese o le ola nei o tatou i ai, tatou te filifili lava le mea o tatou loto ai. Ma e leai se afaina o lea itu, pe afai o tatou lava ua tuu mai i ai le pule e fai mea tatau. Peitai, o le tusi sa faitau nei, o Iesu e ou le galuega, o ia foi e sau ai le faatonuga o le mea e fai. Ma o lona finagalo lea; e le o le faamalie o lona au-soo i le nofoaga e lelei mo latou, a o i ai le feau mo i latou, e pei na taua muamua (Mataio 28: 19). Ia outou o atu e fai nuu uma lava ma so'o”

E leai a se isi e le fia nofo i luga o le mauga, auā e malū lona ea toe felesi. E te iloa ai mea uma i lau matamata mai luga i lalo. Peitai, vaai po o iina o finagalo ai le Alii mo tatou? Ina ua silafia e le Atua Elia o nofonofa i le ana o lona mauga paia i Horepa, ona fetalai lea iai o le Atua, “Elia, ina alu ia oe, ma toe foi atu i lou ala i le vao o Tamaseko.” (1 Tupu 19: 15). Ua toe faafoi lava e le Atua i le mea na tofia e galue ai. Tupulaga o tama ma teine, ma tatou uma. O le Atua lava ia o le mauga, o lona Afioga Paia, a'o tatou o lalo e fai ai la tatou galuega. O lalo lava e saili ai malo, ma faaeaina ai. ‘Aua foi le sailia o tatou lava fiafiaga ma mea e malilie ai o tatou loto, ae tautuana o tatou valaauina. O Iesu o le Atua, ae na alu ifo i le mea aupito maulalo, o le tuugamau ma le oti, ona toe soifua mai lea i le manumalo mamalu, ina ia tatou ola e ala i le faatuatua.

GALUEGA FAATINO:

Tali mai fesili o i lalo mai la tatou Tusi Faitau

1. O ai lea ua liua?
Tali: O Iesu
2. Liua i luma o le au so'o, po o luma o le toatolu?
Tali: Luma o le toa tolu – Peteru, Iakopo ma Ioane
3. O le siufogfa mai le ao, o ai lea?
Tali: O le Atua.
4. O ai ia ua le toe vaaia e pei ona ttau i le f 8?
Tali: O Mose ma Elia

PESE: 255 “Ia tatou faamalosi ..”

A'OA'OGA:

1. Fai le mea o finagalo ai le Alii.
 2. Tautuana o tatou valaauina.
 3. Alu i lalo, i e pau i le mauga.
-

ASO SA: 12 FEPUARI 2023

MATAUPU: O LE TAIALA TU'U FAASOLO MO FANAU

SINI: Ia a'oa'o tamaiti o le vasega ina ia latou iloa, le taua ma le aoga o le tausisia o le taiala ua aumai mo latou.

FESOASOANI MO FAIAOGA:

O le upu Teuterenome, o lona uiga “o le faalua mai o le tulafono,” e lautele lona uiga; Peitai ua fa’aaogaina iinei le tulafono, o se taiala; auā o le tulafono e faatonutonu, puipui, ma leoleo ai le tagata, ina ia le sese ese mai le mea tonu ma lelei. E faapena fanau latou te moomia se taiala malosi ma sa’o e mulimuli ma ola ai. E ui la o tulafono e mo le nuu atoa, ae ua faapitoa lenei vaega o le poloaiga mo fanau; auā a leai se taiala, o le a falala solo foi ma le sagatonu le ola, ma o le a le fua mai foi i se lelei.

O le ata lea o alia’e mai i tua o le poloaiga. “Ia e alofa atu i le Alii lou Atua ma lou loto atoa, ma lou agaga atoa, ma lou malosi atoa.” O le alofa i le Atua i lona tulaga lautele; o le olaina lava lea e fanau o se olaga mamā ma tonu o finagalo ai le Atua. Ae o le galuega lea a matua, faiaoga, ma e ua iloa le Alii, o le faamanatu ma aoao atu le taiala lea mo fanau. E tu’utu’u gutu ma tu’utu’u taliga, mai lea augatupulaga i lea augatupulaga. Ia teu mau i loto o matua, ma tusi foi i pa o le fale, so o se taimi e tau i ai le vaai, o le a manatua pea ma ola ai e le aunoa. Fai mai le poto (Faataoto 22: 6) – A’oa’o ia i le tama e tusa ma ona ala, a oo ina toeaina lava o ia, e le tea ese ai.”

O nei aso ua tele taiala sesē ua faamaite mai e le lalolagi, ma ua mulimuli ai fanau. O le mea lea e matua tatau ai lava ona a’oa’oina i latou i ala o iloa ai lo latou alolofa i le Alii. A oo ina pisi tele matua ma tatou i tiute ma faiva ua valaaquina ai, ona tau le maua foi lea o se taimi, e faasoai ai ma fanau e uiga i le Atua; ae o le taiala e amata fofola atu i totonu o le lotoifale faa-le-aiga. O le taulaga na osia e Iesu, o le fa’aaliga o le Alofa tunoa ma le faamaoni o le Atua mo le lalolagi; a o se taiala mausali mo i latou uma i so o se augatupulaga e faatuatua ia te Ia.

GALUEGA FAATINO:

Tautinoga: “Tusi mai sau tautinoga pu’upu’u e faailoa ai e te Alofa i le Atua, i totonu o le siosiomaga o lou aiga, o lo o e ola ai faatasī ma ou matua, uso, tuafafine ma isi.

Fesoasoani lau susuga i le faiaoga, pe a i ai se taimi. Aua e leai se isi e vaai i le Atua, ae o le faatinoga i le va ma matua ma isi tagata, o atagia mai ai le alofa ma le lelei o le tama po o le teine.

PESE: 371 “Laulau mai pea ia te i matou.”

A’OA’OGA:

1. Alofa i le Atua ma le loto atoa.
 2. Usitai i matua ma ava i tagata uma.
 3. O le Atua le taiala e ola ai.
-

ASO SA: **19 FEPUARI 2023**

MATAUPU: **O LE TALA LELEI MAI LE NUANUA**

SINI: Ia a’oa’o tamaiti ina ia latou iloa, o le nuanua e manatua ai le folafolaga o le alofa o le Atua.

TUSI FAITAU: Kenese 9: 8 – 17

FESOASOANI MO FAIAOGA:

Ua silafia uma lava le uiga o le upu, “*Tala Lelei*,” o le tala i le Alofa o le Atua. O le Alofa e le gata ina faamaoni, ae faavavau foi mo tagata uma lava. E le faigofie i le tatou gagana ona faamatala auiliili lona atoatoa. Ae so o se mea lava e faia mo le manuia ma le ola lelei o tagata, tatou te faamatala le mea lenā o le talalelei, aua o le lelei lava ia o le Atua. O le nuanua la o taua i la tatou tala o lenei taeao, o se faailoga vaiai tatou te manatua ai le folafolaga a le Atua, a o le folafolaga o affi mai ai lona Alofa. So o se taimi e vaiai ai le nuanua, ona manatua lea o lana folafolaga alofa; sa osi feagaiga ai ma Noa ma ana fanau ma mea ola uma lava na ōese mai le vaa; “E le toe avea le vai ma lolo e faaumati ai meaola uma.”

O lo o faamatala e le atamai faa-saienisi le malamalama susulu i totonu o matāua o le timu, ma faatupu mai ai lanu eseese matagofie o tāua o le Nuanua. Peitai, o lo tatou talitonuga e tusa o le tala a le Tusi Paia, o le foafoaga a le Atua e aofia ai mea uma e pei o le timu, ma le natura o mea na faia, lea e mamanu mai ai le nuanua i le vanimonimo, o se meaalofa o faapea mai; Ou te le toe faaoo se lolo e faatafunaina ai le lalolagi uma. O le Alofa o le Atua e tumu i le mau folafolaga matagofie ma ofoofogia mo lo tatou ola. O le itu taua, ia tatou mautinoa, o tatou o tausi mea a le Atua, e tausia ma vaaia lelei le lalolagi, i o tatou taimi; auā o lo tatou faatamala i le natura, e ono oo mai ai le lolovai. O le Alofa foi o le Atua e taua tele ai lo tatou gauai i lo tatou tiute fai. Fanau, tatou toaaga e faitau le Tusi Paia, auā o lo tatou toaaga e faitau, o le tele foi lena o lo tatou iloa i le mau folafolaga alofa a le Atua e pei o lenei, ma tatou tufa ma faasoa atu na talalelei i isi. O Iesu Keriso, o le atoatoaga o le Talalelei a le Atua, e ala i le taulaga o le Alofa Tunoa sa ia saunia. O se Taulaga matagofie e pei o le nuanua, ina ia le toe lofia le lalolagi ma malelemo tagata i le loloto o le agasala, pe a tumau i le faatuatua.

GALUEGA FAATINO: (Fa'aaliga Mafaufau)

Faamatala mai sou iloa, e uiga i le folafolaga lea a le Atua i le nuanua, ma le tulaga ua i ai nei le lalolagi, ua toetoe le misi le lolovai o atunu.

O le itu taua e fesoasoani ai i lau susuga i le faiaoga;

- (i) e le o faaumati le lalolagi uma (tagata ma meaola uma) i se lologa, e ui o i ai tagata o oti ai, ma nisi manu o aafia ai.
- (ii) e iai le pito laau a le tagata e fai, e pei ona taua i le “fesoasoani mo faiaoga” mo le faatumauina o lea feagaiga.

PESE: 8 “E lelei o mea uma”

A'OA'OGA:

1. E lelei le Atua.
 2. O le nuanua e manatua ai le Alofa o le Atua.
 3. E faamaoni le Atua i ana folafolaga.
-

ASO SA: **26 FEPUARI 2023**

MATAUPU: **IA SA’O LE FAAMUAMUA, E FAAOLAINA AI.**

SINI: Ia a'o'a'oina tamaiti, ia latou iloa, o le ave ia o'o le ma'i ia Iesu, o le faamuamua sa'o lea.

TUSI FAITAU: Mareko 2: 1 – 12

FESOOASOANI MO FAIAOGA:

O taua e Mareko, o le taunuū ane o Iesu i le fale, sei mapu te isi ane, mai le mamafatu o le galuega. Peitai, e lei mafai ona lilo lona taunuū ane, ma lolofi atu ai loa le motu o tagata ia te Ia; Ona toe suia atoa ai lea o lana polokalame, ona o le mea aupito sili lea ona ave i ai lana faamuamua i lana galuega, o le lavea’iina ma le faamaloloina o tagata. Ua matuā leai se ofi ma ua faigata ona maua se avanoa e feiloiat atu ai isi ia Iesu. O i latou foi sa fataina atu le tagata ma’i, latou te leiloa atu Iesu i le tumu. Sa latou manatu ifo, ma ua loto faatasi loa, o le a latou feae’i i luga, e tatala le apa o le fale, ma tuu ifo ai le moega o le supa, ia oo lava ia Iesu. O taua e Mareko, o le faatuatua o le au sii ma’i ia Iesu, lea lava sa sailili auala ai, i se faiga e vave oo ai le ma’i i le Alii, auā o le faamuamua lava lea, ia oo ia Iesu le ma’i. E lei taofia i latou e se mea lava e tasi. O Iesu foi, sa matuā tinou i lana galuega, aoao atu ma faamalolo. Ina ua oo ifo le supa i ona luma sa ia ave i ai lana faamuamua ma faamalolo loa ia te ia. Ua o faatasi le faamuamua a le au sii ma’i ma Iesu, lea ua ola ai le ma’i.

O le sai ane a taitai o Iutaia, ona o lo latou talitonuga e tusa o le tulafono o i ai i le Levitiko 24: 15 – 16. O lea lava latou te iloa Iesu, ae nonofo lava ma fai lea tuuaiga sese. A o Iesu, e le o se tagata o faifai i le Atua auā o Ia o le Atua. A lea ua faamaonia lona tulaga Atua i lona faamaloloina o le tagata ma’i (f 9 – 12). O le mea moni lava, o i ai lava tagata e le o ō i le Atua, e faamalolo ai o latou ma’i, ona o mafuaaga eseese. O le galulue faatasi e ave le faamuamua, ina ia oo tagata mama’i i le Alii o le itu tāua lea.

Fanau, galulue faatasi, ma ave le faamuamua i le faamalogia mai le Alii o Iesu. Auā o Iesu Keriso foi, sa ia faamuamua le lavea’iina o le lalolagi mai le agasala, e ala i le Taulaga o le Faaolataga, sa au faatasi ai lona loto ma le finagalo o lona Tamā.

GALUEGA FAATINO: (Taliga Fesili)

1. Faamatala mai le mea sa ave i ai le faamuamua a i latou e to’ā fa, sa fataina atu le ma’i supa!
- Tali: O le gaoioiga a i latou nei sa fai, o lo o iloa ai lo latou talitonu, e ola ma malolo le ma’i ia Iesu. Ma o le itu tonu lea sa ave loa i ai la latou faamuamua. Tau lava ina oo le ma’i ia Iesu.
2. Ae o faafefea ona e iloa le faamuamua a Iesu?
- Tali: O lo o iloa i le taunuū ifo o le ma’i i ona luma, mai luga o le ufi o le fale. Sa ta’atia loa mea uma, ae faamalolo loa le supa ua i ona luma i lea taimi.
3. O le a se gaoioiga o e iloa ai le faatuatua o le au sii ma’i ia Iesu?
- Tali: Ina ua faigata ona maua se avanoa, e lei toe faatali, ae feae’i loa ma tala apa o le fale, i lo latou talitonuga, e ola le ma’i pe a oo ia Iesu.
4. O le a le fetalaiga a Iesu, ua tuuaia ai o Ia, fai mai o lo o faifai i le Atua?
- Tali: “Lo’u atalii e, ua faamagaloina au agasala”
5. E faafefea ona iloa, pe faamaonia e le o faifai le Alii o Iesu i le Atua?
- Tali: O tu’uaiga fai mai na o le Atua na te mafai ona faamagalo agasala, lea ua faamaonia; O Iesu o le Atua lava Ia, auā o lea ua na faaola ma faamalolo le tagata ma’i.

PESE: 385 “O ai ea lo tatou ola, o Iesu na o Ia.

A’OA’OGA:

1. O Iesu tatou te ola ai.
2. Faamuamua le Alii o i ai le mautinoa.

3. E le faatali le sailiga a le tagata faatuatua.

.....

ASO SA: **5 MATI 2023**

MATAUPU: **IA ILOA TAU, MA LOU LAVA KOLIATA**

SINI: Ia a'oa'o tamaiti ia latou iloa, o mea matautia o tau faafefe mai, e toilealo i le Alii.

TUSI FAITAU: 1 Samuelu 17: 20 – 27, 42 – 47

FESOASOANI MO FAIAOGA:

O le mataupu atoa lenei, 1 Samuelu 17: 1 – 58, o le tala masani ia Koliata le toa ta'uta'ua o Filisitia, lea na fasiotia e Tavita le atalii o Iese. O fuaiupu ua filifilia tatou te faitauina, tau ina tatai ai tatou i le uiga ma le agaga tonu o tuliloa i la tatou Mataupu o lenei Aso Sa. O le aotelega o le tala, o lo o iloa mai ai le fefefe ma le atuatuvale o Isaraelu i le toa lenei o Filisitia i le f 11, fai mai sa matuā fefefe ma matata'u Isaraelu, e oo lava ia Saulo lo latou tupu, ina ua latou faalogo atu i le leo o Koliata o alaga mai iā i latou.

O le alu ane la o Tavita, e asi ona uso, o i ai i le itu taua a Isaraelu, ae toe alaga mai loa Koliata ina o le a gāpā le taua. Sa faalogo lelei Tavita i upu a le Filisitia; a'o tagata uma o Isaraelu, ua vaai atu i le maualuga ma le matautia o le tamaloa, fai mai ona latou sosola lea i ona luma, ma ua latou matuā fefefe lava. O i tonu na ofo atu ai loa Tavita o le a alu i le taua. Sa fili e Tavita maa lamolemole e lima, ma lana ma'ata, ona alu atu loa lea e tau ma le Filisitia. Sa alaga mai Koliata ia Tavita ma fetu'u mai i lona Atua; sa ia folafola mai foi lona fafagaina o

manu lele ma manu vaefa i le tino oti o Tavita. Peitai, sa tautino atu e Tavita ia Koliata; E te sau ma le pelu ma le tao, ae ou te alu atu ia te oe i le suafa o le Atua o Isaraelu, Le ua e faifai i ai. Ou te fasiotia nei oe, ma vave ese lou ulu, ona aina lea e manu tata'a ma manu felelei lou tino. O le pine faamau lena e iloa ai e le lalolagi, o i ai le Atua ia Isaraelu. Ae sili ma talitonuina ai e tagata uma, e le faaolaina e le Atua tagata i se pelu ma se tao, ae o Ia o le Atua na te faia le taua.

O le uiga tonu lena o la tatou mataupu. O tagata o Isaraelu, na o le sauai lava o faalogo ma vaai atu i ai i lona matautia, ona fefefe ai lea ma palaai. O Koliata lena ia te i latou, o le palaai ma le fefe vale. A o Tavita, o lo o taula'i lana vaai ma lona loto i le taunuuga telē nei misi, o le Atua lea sa ia iloa, e le na'o ia, o i ai le Atua e tau mo ia, ma Isaraelu lona nuu. Talitonu o i ai le Atua ia i tatou, na te faavaai tatou i taimi faigata, e ala i o tatou mata faa-le-faatuatua. Avea tatou e pei o Tavita i le olaga o tatou i ai nei. Fa'aatoatoa le talitonu ma le faatuatua i le Atua, le mafai na te faatoilalo ma aveese, lo tatou palaai ma le fefe o fai ma Koliata i lo tatou ola. Auā o le Atua o ananafi i le taimi o Tavita, o le Atua lava lena o tatou i le Asō, ma taeao foi.

Fanau, 'aua le avea le fefe ma le palaai i le vaai atu i le tino telē, le malu-alii ma le faalogo atu i le taalili vale o le leo, ma so o se matautia o le ola, e faava'atuia ai le talitonu ma le faatuatua i le auai mai o le Atua ia i tatou, lo tatou malosi ma le mafai. E lei solomuli foi Iesu i le faamalumalu ifo o puapuaga matautia ma tiga ogaoga o le satauro le oti ma le tuugamau. Auā sa ia silafia, o au faatasi ma le Atua lona Tamā, Le na ia faia le vavega sili, o au toe soifua mai ai i lona manumalo mamalu.

GALUEGA FAATINO: (Mafaufauga loloto)

Tau mai se isi tala e te iloa o i le Tusi Paia, ma faamatala pu'upu'u mai; lona uiga e tutusa ai ma le autu o tuliloa i le mafaufauga o le mataupu lenei.

- Tali: E fesoasoani lau Susuga i le faiaoga, faatasi ma nisi tala o e silafia, e tau i tamaiti.
- Tala ia Mose ma le sami ulaula (Esoto 14: 10ffff)
 - Tala ia Tepora le faamasino fafine, ma Parako le palaai (Faamasino 4: 4 fff)

PESE: 167 “Ina tutu i luga”

A'OA'OGA:

- O le faatuatua o le au lava lea ma le Atua.
 - ‘Aua le palaai.
 - Ola i le Alii, ae le o le pelu.
-

ASO SA:

12 MATI 2023

MATAUPU:

***O LE ILOA LELEI O IESU, E
TAITAIINA AI I LE SALAMO***

SINI:

Ia a'oa'o tamaiti o le vasega ina ia latou iloa, o le talitonu i le Alii, e gagana mai lava i le mea moni oi le loto, ona o le alofa.

TUSI FAITAU: Mareko 14: 66 – 72

FESOASOANI MO FAIAOGA:

O le Mareko 14: 1 (ff), o se mataupu umi, ae o faamauina ai le agai atu o Iesu i lona Maliu ma lona Toetu; o aofia ai iimei ma lona faalataina e Iuta lona lava so'o, ma le tuuina atu o Ia i le ositaulaga sili, a o tau saili pea ni mau, ina ia fasiotia ai o Ia. O

le a tatou le taea le sailiga o ni mau e pei ona iloa I le f.53 – 65; A'e o le vaega mulimuli sa tatou faitauina, f 66 – 72; aemaise lava fuaiupu o tautino ai e le auauna teine a le Ositaulaga Sili – “O Peteru o se tasi sa faatasi ma Iesu le Nasareta,” O iina o lo o faatatau tonu i ai la tatou Mataupu. O upu tautino ia a le auauna teine o autu i ai la tatou mataupu o lenei Aso Sa; - O le iloa lelei o Iesu ua na osofia le teine e tautala i le mea moni, ma taitaiina ai ia i le salamo.

Tatou te matua ofo ona o le auauna teine o taua nei e leai sona igoa; O le auauna a le Ositaulaga sili, a'e o lo o ia faamaonia mai, “O Peteru o se tasi o so'o o le Alii o Iesu.” E faapefea ona mafai e lenei teine ona tautino ma faamaonia, o Peteru o se tasi o so'o o Iesu, ae le o ia o se tagata o mulimuli ia Iesu? Afai na te iloa Peteru, o lona uiga na te faamaonia foi faamalologa, a'oa'oga ma lauga a Iesu! E leai se faaletonu e tasi, o le mautinoa ma le faamaonia e lenei teine, o Peteru o le so'o o Iesu! Aua, e lei fesili le teine ia Peteru; “Po o ia o se tasi o le au so'o o Iesu? Leai! E lei taumatea foi e le teine; “Pei a oe o se tasi o le au so'o o le Alii! E leai lava! Ae sa fai sa'o atu lava le teine ia Peteru – “O oe o le tasi sa faatasi ma Iesu le Nasareta” o iloa iinei, e le o mafai ona tautino mai e le teine lona talitonu ia Iesu, ona o ia o le auauna a le Ositaulaga Sili. Peitai, e le o fefe lava e ta'u le suafa o Iesu le Nasareta, i taimi le ta'ugamalie faapea. Tatou te le mafai foi la ona taua o ia o se fili o Iesu, ona o lona faasinomaga o le auauna a le Ositaulaga Sili; Ae ua tatou iloa, o ia o se tagata na te le o natia lona tautala atu ma tautino le suafa o Iesu i le fesootaiga a Iesu le Matai, ma Peteru lona uluai so'o. O lona le fefe e ta'u le suafa o Iesu i taimi ma'aleale faapea, o iloa ai, o lea tagata na te talia le Alii ma alofa i ai. O le talitonu ia Iesu, o se tautinoga o le loto e gagana mai i le moni ona o le alofa. Na te mafai foi ona taitaiina le tagata i le Atua i le loto salamo moni, ma mafai ai ona toe faafou le ola, ma fa'aatoatoa le mafuta faatasi ma le Alii. O le faatuatua e foai mai e le Atua i tagata uma, le afaina le siosiomaga o i ai, auā e tutusa tagata uma i ona luma pe a talitonu ia te Ia.

E ui i le matautia o le pogisa o le po, ae sa sili le matautia o le pogisa ua oo i ai Peteru, talu lona faafitia o lona Matai. O le vivini o moa, o le faailoilo o le aso fou ua lata mai ona lagona ai lea e Peteru ina ua ia manatua le fetalaiga a Iesu, ona tagi lotulotu ai lea. Ai lava ana ioe atu Peteru i le tala a le auauna teine, atonu o lana tautinoga foi lea e tutusa ai i laua, ma māmā ai ona lagona tiga, e ui e le suia e se isi le mea o finagalo ai le Atua.

Fanau, ‘aua nei avea tapu ma tulaga lamatia o le ola, e vaoia ai lou tautino atu o le mea moni a o i lou loto e uiga i le Alii o Iesu. Aua po o a faigata ma le ola saisaitia o tatou i ai, e le vaoia ai le Atua, mai lona faagaganaina ma lona lavea’iina o tatou lana fanau i lona lava mana Alofa.

Le mana alofa lea o le Atua, sa Ia toe faatuina mai ai Iesu le Keriso, mai le oti ma le tuugamau, ma taitaiina ai tagata i le salamō ma le faatuatua moni i le Alii.

GALUEGA FAATINO: (Fefa’alia’iina o mafaufauga i itu-aso ma’ale’ale faapea e tusa o le tala)

1. Fa’али mai sou manatu, po o le a se itu e lelei ai upu o tautino e le auauna e uiga ia Peteru, a o le a foi se itu e le lelei ai mo ia?

Tali; (i) O le itu e taua ai mo Petruru, e lu’i ai lona loto tele ia Iesu, ina ua toe faalogo i lona igoa; Pe mafai ai ona tumau ia te Ia i le faatuatua faamaoni.
(ii) O le itu e lē lelei ai ia Peteru lava ia, ona o loo tausaili ni mau ina ia fasiotia ai Iesu.

2. O le finagalo lava o le Atua, e ala atu i le maliu ma le toe soifua manumalo mai o Iesu, le faaolataga o le lalolagi. O lona uiga la, e tatau lava ona maliu Iesu. O fea la e sili ona lelei mo Peteru? O le maliu o Iesu ae sa ioe ile tautinoga a le auauna, po o le maliu o Iesu, a’o ia faafitia o ia? (Faamatala mai lau tali)

Tali: (i) E sili le maliu o Iesu ae ioe i le teine! E ala ona lelei lea, aua ana ioe, e malii ane lava le Alii, a o la ua ia tautino, e sa’o o ia sa la faatasi ma Iesu.

(ii) E lē lelei le maliu o Iesu, a o faafitia pea e Peteru o ia, ona ua leai se aoga o lona avea ma so’o o le Alii.

3. O le vivini o moa, o le faailoilo ua oo mai le aso fou. O le a se taua mo Peteru?

Tali: O le aso fou, o le faamanatu ia Peteru, e tatau ona faafou lona ola faatuatua i lona Matai, ona mafai lea ona fai le galuega.

PESE: 234 “Pe a ita tele mai”

A’OA’OGA:

1. Faatuatua i le Atua e lavea’iina ai oe.
2. ‘Aua le fefe e ta’u le Suafa o Iesu i taimi faigata.
3. Manatua le Alii pe a vivini moa

.....

ASO SA: **19 MATI 2023**

MATAUPU: **OLIOLI I LE ALII E LE AUNOA**

SINI: Ia a’oa’o tamaiti ia latou iloa, o le olioli moni lava, e le ona o ni faamanuiaga, ae ona o le mautinoa, o soifua pea le Atua, Le na te silafia mea uma!

TUSI FAITAU: Sapakuka 3: 16 – 19

FESOASOANI MO FAIAOGA:

O Sapakuka, o se tasi o Perofeta e to'a sefulu ma le lua o tatou taua o Perofeta laiti (Minor prophets) . Sa galue i le malo i Saute, o le malo lea o Iuta, i le vaitaimi o le malosi o le malo o Papelonua (Kaletaia). E malamalama gofie la tatou mataupu, pe a faamatala i le tulaga aoao tetele o le Tusi; auā o mataupu muamua e lua (chapters 1 & 2) e foliga na o le faaseā lava o le Perofeta, ma tuu fesili i le Atua; pe aisea? A fiu e fai le galuega ia Iuta, ae leaga lava ma agasala; ‘Aisea e le aoai ai loa? “Afai foi ua faamaualuga tele foi Papelonua; Aisea e le faasa'o ai loa, ae saga tuufau o le a? O oe o le Atua e ou mea uma, o oe foi o le pule aoao; Aisea ua tuai ai ona fai? O le tali mai a le Atua, na malamalama ai le Perofeta, ma lagona moni ai e lona loto le olioli, o lea na ia tatalo ai i le Atua i le tatalo o le faatuatua, lea ua avea ma pese, e pei ona usuina nei i le mataupu e 3, sa tatou faitauina.

O le tatalo po o le pese o tautino ai e le Perofeta le tulaga silisili ese o le Atua, ma ala eseese ma le matalasi o fa'aalia ai lona alofa. O le vaega mulimuli o taula'i i ai la tatou Mataupu o lenei Aso Sa, f 16 – 19; O tautino ai e le Perofeta, le matautia ma le lē mafai e se isi, ona suesueina le poto ma le mataisau o le Atua. O le mata'isau lea o le Atua o fa'aalia mai ai lona Alofa; A o iina tonu sa matua iloa tonu ma lagona ai e le Perofeta lona faatauvaa i luma o le Atua, e pei ona tau faamatala mai le vaega muamua o le f.16, sa iloa ai foi iina e le Perofeta, e lei taitai ona ia iloa le Atua, ma lana lava fuafuaga poto; ona ia nofo fifilemu ai lea, ma faatalitali pe a i le Alii.

O le faaiuga la i le f 17 – 19, o manino mai ai le uiga loloto o le olioli i le Alii, e pei ona tuliloa i la tatou Mataupu o lenei taeao. O la tatou mataupu e tusa o la tatou faitau – O le le fua mai o le fanua, ma le ta'ata'a mala o lafu manu, i le f.17, o le ata o le mativa ma le leai o se faamanuiaga, e tutupu ai lagona faanoanoa ma le lē fiafia. Ae fai mai le Perofeta i le f.18 – Peitai a'u, ou te olioli lava i le Alii, ou te fiafia lava i le Atua lou faaolataga. O le pogai tonu lena o le olioli i le Alii e le aunoa – E le fuaina, pe faavaea i le tele o faamanuiaga a le Atua i lo

tatou ola o fai nei. Ae olioli ona o lenei le mea moni. O iā te i tatou le mautinoa, “O lo o soifua lo tatou Atua e faavavau, o Le e Alofa, ma na silafia mea uma. O le malosi lea o le auai mai o le Atua ia tatou ua le afaina ai faigata uma o tatou fesagai, ma tatou manumaloina ai foi luitau uma.

Fanau, ia tumau lo outou olioli i le Alii, ina ua iā i tatou le mautinoa o lona Alofa tunoa, e ala ia Iesu ma le Taulaga faaola na Ia fai; ua faatamaoaigaina ai tatou, sa matitiva masaesae i le agasala.

Uiga o Upu:

- | | | | |
|------|-------------------|---|--|
| i) | sapotuvale (f 16) | - | topetope ua leai se mapu |
| ii) | tetemu (f 16) | - | fefe/palaai |
| iii) | aila (f 19) | - | o le manu e igoa o le deer,
e fai seu, e malosi e tamoe
saosaoa i luga o mauga, ae
le maua i Samoa nei. |

***GALUEGA FAATINO:* (Taliga Fesili)**

1. O ai lea sa faalogo i nei mea uiga ese i le Atua, e pei ona taua i le f.16?
Tali: O le Perofeta o Sapakuka.
2. Ae aisea ua faapea ai o ia o taua i le f.16?
Tali: Ua na iloa lona faatauvaa, pe a fua i le matautia o tala i le Atua ua ia faalogo ai.
3. A tupu ia oe le mea o taua i le f 17, e te fiafia pe faanoanoa? (Faamatala mai le mafuaaga o lau tali, fua i le uiga o tuliloa i la tatou Mataupu)
Tali: (i) Fiafia

- (ii) E fiafia, aua o le olioli moni i le Alii, e tusa o le mataupu, e le fuaina i ni manuia faa-le-tino, a'o le mautinoa, o lo o soifua le Atua.
4. O le olioli ma le fiafia o le Tusitala o taua i le f 18, e mafua ona o lo o ia iloa, o lo o soifua le Atua, pe leai?
- Tali: Ioe! E mafua ona olioli ma fiafia, ona o lo o ia iloa, o soifua le Atua e ou mea uma.
5. O le a le fesootaiga o le aila o taua i le f.19, ma le olioli o tuliloa i le Mataupu?
- Tali: O le tagata e olioli, ona o lona mautinoa o le Atua Soifua e alofa ia ia; e tiotio ma vae mama e pei o le aila, e le vaivai, ae momoe saoasaoa i mea maualuluga.

PESE: 34 “Tatou te olioli, tatou te faafetai”

A'OA'OGA:

1. Olioli i le Alii e ou mea uma.
 2. ‘Aua le fefe, o lo o soifua le Alii.
 3. Tiotio i le Alii pei o le aila.
-

ASO SA: **26 MATI 2023**

MATAUPU: **O LE PULE AOAO A LE ATUA**

SINI: Ia a'oa'o tamaiti ina ia latou iloa, o le Atua o i ai le pule, e aoao i mea uma lava.

TUSI FAITAU: Mataio 10: 26 – 33

FESOASOANI MO FAIAOGA:

O le mataupu atoa i lona aoao tetele, o le auina atu e Iesu o ona so'o e fai le galuega. E le faigofie le avea ma so'o o Iesu; Peitai, o Iesu lava ia e ou le galuega, na te silafia le mamafa faaletino, e sauaina ma lamatia ai le so'o. ae le o ni faigata e atugalu ma popole vale i ai, pe afai e moni ma faamaoni lo latou iloa, ma lo latou talitonuina o Iesu; O Iesu le pule aoao o mea uma, na te silafia mea uma, e usitai foi ia te Ia mea uma.

O le auina atu la e Iesu o ona so'o i le galuega, o lo o auina atu lava faatasi ma faatonuga, e tapenaina ai i latou pe a fetaia'i ma sauaga e oo lava i le oti, e pei ona amata mai le f. 16. Ae o le vaega lava sa faitauina mo la tatou mataupu o lenei Aso Sa, f.26-33; o agai tonu ai le faamamafa a Iesu i lona au so'o, e uiga “I LE SILAFIA E LE ALII MA LONA TAUSIA O MEA UMA NA IA FAIA” E oo a i le oti, e le tatau ona palaaa'i ai, ma manatu e le silafia e le Atua. E leai lava se mea e tasi e le fa'aalia, e leai foi se mea e lilo, tusa lava po o le a le faatauvaa e tau le vaia e mata. E silafia lava mea uma e le Atua. O le uiga loloto la o le manatu o fia tuliloa iinei. O le aveai a Iesu i ona so'o – A na le matatau i le mea ua avea ma fili matautia i le tagata, “O le oti lea.” O le fefe i le oti, ma le mafaufauga, “e i ai lava le iuga o mea uma” na te tu'u le tagata i le le mautonu ma le fefe. O lo tatou olaga faale-tino nei, o le tele ia o mea tatou te popole i ai. O le ma'i! O le mativa! O le oge ua fia aai! leaga fale e nonofo ai, ma le anoano o isi. A o i tonu lava, e tatau ona tatou mafaufa, o lo tatou tiute lea, ia tapena ma sauniuni lelei mea e lagolago ai lo tatou i ai i lenei lalolagi. O le popole foi lea ma le fefe, ua aapa ai le tagata i so o se mea lava na te iloa e fai ma fesoasoani, tusa lava po ua faamalosi mai ai ma mea totino a isi tagata.

O a'oa'oga a Iesu e ese! Ua tatou iloa ai; O le Atua foafoa, na te silafia lava ona tausi lelei, ma vaai lelei ana mea na fai. Ona o le tagata la na fai e le Atua, e taua tele i lona finagalo, e tatau ona lautele lona faamaoni ma lona talitonu ia te Ia. Le Atua na te silafia ma tausia manu-it; ma na faatumau laulu i o tatou ulu;

O le Atua foi lena na te faatagaina tatou ia tatou i ai ma ola pea i lenei lalolagi, i taimi o ia finagalo ai, e le sili atu, pe itiiti ifo foi. Fanau, ia iloa ma talitonu o le Atua e ou mea uma, o lo o ia tausia ma vaaia lelei ana lava mea na fai e aofia ai ma tatou i Lana tausiga Alofa lea, na fa'aatoatoa mai i le soifua paia o Iesu lona Alo pele, e ala i le Taulaga na ia osia, ina ia ola ma manuia le lalolagi faatuatua.

Uiga o Upu:

- i) kena (f 28) - faatusa o seoli (O le to e le gata)
- ii) asari (f 29) - o le tupe e tutusa ma le pene e tasi (penny) pe tusa lava o le sene e tasi i aso nei.

GALUEGA FAATINO: (Taliga Fesili)

1. O ai o faasino i ai le upu “latou” o i le f.26?

Tali: Faasino i le lalolagi po o i latou o agai i ai le talaiga, ae maise i latou e le talitonu.

2. E tasi le pene (asari) na faatau ai tama'i manu e lua, ae fia le tau o tāua e toalua, na faatau a'i e le Atua?

Tali: “O le Alofa Tunoa o le Atua,” lo ta tau; pe o le soifua atoa lava lea o Iesu.”

3. Tago e toe tusi mai le vaega mulimuli o le f.29, i ni au lava upu, e ta'u mai ai ona uiga faigofie ma iloa ai foi o e malamalamai i le fuaiupu lena?

Tali: E leai se manu o tamai manu ia e lua o tā'ua, e paū i le eleele, ae faapea e le iloa, pe le silafia e le Atua. E silafia lava e le Atua lo outou Tamā mea uma.

4. O le pule aoao la a le Atua i mea uma, e tusa o la tatou Mataupu e le tatau ai i le tagata ona fefe i le oti, auā e le oti? Pe le tatau ai i le tagata ona fefe, auā e oti lava?

Tali: E le tatau ona fefe, e ui e leai se tagata e ola pea, e oti uma lava tagata. Peitai, ona o le Atua e pule aoao i le oti ma le ola, na te toe faatuina faatasi ma Iesu, le tagata ua oti i le tino, a'o faatuatua lona loto i le Alii.

5. O ai tagata ia e mafai ona latou fasiotia le tino, ae latou te le mafai ona fasioti le agaga?

Tali: O tagata uma lava e le toe tutu mai i le ola faavavau.

PESE: 82 Avatu i le Tupu viiga e tatau.

A'OA'OGA:

1. E le lafi se isi i luma o le Atua.
2. E tausia oe e le Atua.

.....

MANATU TAIALA APERILA – ME:

TUMAU I LE VAA E OLA AI

O le lapataiga faalauaitele mo tagata folau uma i le vasa tele, aua o le vaa, o le malu ma le apitaga o tagata i le sami. E le sao se isi e oso ese i le sami mai le vaa. E faapena la tatou folauga o fai nei i le ola, e malu ma sao tatou uma, pe a 'aua le oese ma le Atua, ae tatou tutumau ia te Ia.

ASO SA: **2 APERILA 2023 (ASO SA LAUPAMA)**

MATAUPU: **VALAAUINA E TAUAVE IESU I TAIMI UMA**

SINI:

Ia a'oa'o tamaiti ia latou iloa, e leai se mea e taunu manuia, pe a na o tatou, e aunoa ma Iesu.

TUSI FAITAU: Mataio 21: 1 – 11

FESOASOANI MO FAIAOGA:

O le tala masani lava lenei i le malaga faatupu a Iesu i Ierusalem, e pei ona faamauina uma lava e le au fai-Evagelia. O le ifoa'i o le mauga o Olive i Petefake, sa faatonu ai so'o e to'alua o le Alii, e õ e tatala mai le asini, lea sa tietie ai Iesu i le malaga. E tele le aloaia, ma le faaeaea o tagata i le afio atu o le Alii, pe a fua i la latou alalaga, ma la latou faatinoga sa fai. E i ai la le tala logologoa lava ua leva, e afua mai le malaga lea. O le tala e uiga i le asini sa tietie ai Iesu. Sa matua nene'e ma fiafia le asini i le tali mai a tagata. Sa latou fola le ala i la laau, o latou ofu, o lau pama. Sa matua mimita le asini, ma faapea ane i lona loto, o nei mea uma o lo o faaeaea ai lona malaga atu. Ina ua tuanai nai aso, ona manatu lea o le asini, o le a toe foi i lo latou nuu, ae o le a toe ui lava i le ala na sau ai, ma lona talitonuga, o le a toe fetaiai foi ma le mafanafana ma le aloaia, e pei ona sa sau ai muamua. Peitai, e le tutusa lona toe foi mai, ma lona alu atu; ua faafeagai mea ia. Auā na iloa e isi tagata, e lei afaina iā latou; A o isi, ua latou tauai le asini i ma'a ma tuli ia te ia. Ona manatu lea o le asini, ua faapea ona fai iā ia, ona ua leai se Iesu, ma o le mea lea e tupu, pe afai tatou te o na o i tatou, ae leai se Iesu. Ma o le uiga lea o la tatou mataupu o lenei Aso Sa, ua valaauiina tatou, tatou te õ ma ave Iesu i taimi uma, ma so o se mea tatou te õ i ai.

Auā, tusa lava po o le savaliga i le ola o fai nei, o lo tatou õ e talai le Tala Lelei ia Iesu, ae a galo ona tatou tauave ma malaga faatasi ma Ia, o le iuga lea e oo ia i tatou, o le tuli tauta solo e tagata ma tauai tatou i ma'a. O le a vave ona mavae atu lo tatou amanaia ma le fa'aaloalogia e tagata. O le umi lava ona i ai Iesu faatasi ma tatou i lana Talalelei, i lo tatou ola atoa ma o tatou

valaauiina. Tusa lava po o a faigata tatou te fesagai ma ui ai, o le a tatou maua lava le taui mulimuli.

Le fanau ma tatou uma, ia tatou aveina pea Iesu faatasi ma tatou, ia tatou filifiliga, ma o tatou tiute fai uma. O Iesu foi, e le'i afio lava na o Ia i lana galuega, ae sa faatasi lava ma lona Tamā; lea na taualuga i le Taulaga Faaola, ua tatou ola ma filemu ai, e ala i le faatuatua.

GALUEGA FAATINO: (Mafaufauga loloto)

Tusi faapu'upu'u mai, ma faamatala manino mai se isi tala o le Tusi Paia o e iloa, o vavala mai ai le vaivaiga lea e pei ona auau i ai la tatou mataupu.

Fesoasoani lau susuga i le faiaoga, e tau i tamaiti ni tala o e silafia, e tusa o le mafaufauga o le aso.

- eg (i) Tala i le tupu o Saulo, sa lelei lava ma lauiloa i le amataga, a'o õ faatasi ma le Atua, na tuu loa le Atua ae fai lona poto, tifa loa!
- (ii) E le'i sou fua le sami ma folo Iona e le i'a, na mafua ona ua tu'u le Alii, ae alu na o ia.

PESE: 222 “Aue loto ua leaga, ua matua soesa”

A'OA'OGA:

1. O pea ma le Alii i taimi uma.
2. E leai se tatou pe a leai Iesu.
3. Faamama le loto fefete.

.....

ASO SA: **9 APERILA 2023 (ASO SA TOETU)**

MATAUPU: **AUA TOU TE MATATA'U**

SINI: Ia a'oa'o tamaiti ia latou iloa; o le avea'i mai le agelu, o upu o le mautinoa.

TUSI FAITAU: Mataio 28: 1 – 10

FESOASOANI MO FAIAOGA:

O le Aso Sa lenei o le Toetu, e pei ona tatou faamanatu i tausaga taitasi. O le Toetu mai le oti, e le o se mataupu faigofie, ona e oo mai lava i le asō, e i ai lava tagata latou te lē taliaina, pe latou te lē talitonuina. A o tatou, ua taua o le au Kerisiano, po o e ua talia ma faatuatua i le vavega lenei o vavega na faia e le Atua, e ala i le faatuina mai o Iesu mai le oti ma le tuugamau.

O le aveai la mai le agelu i tinā, sa muai usu atu i le tuugamau, “Aua lua te matatau,” o le upu lava foi lea a Iesu sa fetalai atu ai i tinā, i le nofoaga lava lea, i ni nai minute talu ona fai i ai le agelu. E leai se mea fou o tupu i lea taeao, auā o mea uma lava e oo i le maliu ma le Toetu mai o Iesu. Ua uma lava ona mua'i tau atu, a o le i oo mai i le faataunuina o nei mea uma. Pau lava lea o le itu faigata, ona e tusa lava po o so'o o Iesu, po o tinā foi e pele iā latou le Alii, o tagata lava o i ai le lagona le mautonu, a'e maise itu aso faapea, ua oo ai le Alii o Iesu i lona mamalu (Toetu). Ae o le tuanai po o le uma atu o ia upu o le mautinoa e pei ona fai ma tatou Mataupu o lenei taeao; ‘Aua tou te matatau’’ Na mulimuli mai ai loa ma le feau moni lava o le Eseta, “E le o iinei o Ia, a ua Toetu mai o Ia, e pei ona muai fetalai atu. Ua muamua atu o Ia i Kalilaia. O laia ma ta'u atu le talalelei, a'e 'aua lua te matata'u.

Ua toetu Iesu mai le oti, e le o toe i ai i le tuugamau le nofoaga o le oti. Ae o lo ua muamua atu o Ia i o tatou luma, ma o la tatou galuega o le ū atu e tala'i le talalelei. Ua toetu mai Iesu. Fanau ma tatou uma, o lo o faapea mai le agelu ia tatou; aua le popole faatoatoa lelei le mafaufau; fiafia ma fifilemu. O ia tulaga uma ma isi, e faalagolago lava ia tatou. O lea ua taunu; Ua toetu Iesu, e manumalo pea e faavavau. O le taulaga lea o le Alofa

tunoa o le Atua mo le lalolagi; Ina ia le toe matata'u i le oti, auā o lea ua manumaloina e le Alii i le aso nei.

GALUEGA FAATINO: (O lou iloa faa-Mataupu Silisili)

- (i) Faamatala faapu'upu'u mai, i au lava upu, le uiga o le Toetu o le tagata faatasi ma Iesu.
- (ii) O le tagata lea e toetu faatasi ma Iesu, o lona uiga e le oti, e ola pea lava?
- Tali: Fesoasoani i ai lau susuga i le faiaoga
- (i) O le tagata e oti o faatuatua faamaoni i le Alii, e oti a i le tino faalelalolagi, ae o le talitonuga, o ola faatasi ma le Alii Toetu i lona malo e faavavau.
- (ii) E leai se tagata e faavavau, e oti lava tagata uma a'e o le tagata o taua i luga, e toetu faatasi ma Keriso.

PESE: 48 “Ina tatou faafetai, Aleluia”

A'OA'OGA:

1. Aua le fefe, ua Toetu Iesu.
 2. Fai oe ma ave feau o le Toetu.
 3. Taumafai ia lua toe tutu faatasi ma Iesu.
-

ASO SA: **16 APERILA 2023**

MATAUPU: **TOE FOI I LE ALA SA'O**

SINI:

Ia a'oa'o tamaiti ia latou iloa, o le mea ua valaaufina i ai le tagata e le Alii, o le ala sa'o lena e savali ai.

TUSI FAITAU:

Ioane 21: 1 – 14

FESOASOANI MO FAIAOGA:

O la tatou mataupu i le vaega o le tusi sa tatou faitauina, o lo o manino ai; O le fetaiaiga lea a Iesu ma ona so'o o taua. O le taimi ua mavae lona toetu manumalo mai; Ae o ta'u manino mai foi i le fuaiupu mulimuli (f.14), o le fa'aali faatolu lea o Iesu i ona so'o talu ona toetu mai. Na o Ioane le so'o ua alofaina e Iesu o ta'ua, sa ia iloa o Iesu lea, masalo, pe ona o iloa e Ioane, o le vavega foi lea sa faia e Iesu muamua, lea na valaaufina ai Peteru o taua i le Luka 5: 1 – 11.

Ua mavae le maliu ma le toetu manumalo o le Alii, ae muliai ia mea, ae ua leva ona valaaufina Peteru ma so'o o le Alii i le galuega, ma le ala tonu latou te ui ai e tusa o lo latou valaaufina. A o le tulai mai o le tulaga lea e tusa o le molimau a Ioane; E foliga mai ai, o so'o o Iesu, pei se kulupu e lei faamasania ma e le'i faasinoa i ala o le galuega talu ona maliu Iesu. Lea ua alu Peteru ma taena'i atu ai isi e fagogota, a o isi e pei o Natanielu ma Toma po o Titumo o taua, e le o ni faifaiva. Ua o atu uma ai lava, pei ua leiloa le mea e o i ai, ma le mea e fai. Sa koleni lelei lava ma a'oa'o e Iesu ona so'o e toa sefulu lua, mo le galuega aemaise le misiona faapitoa. Peitai, o le taimi tonu lea, e foliga ua latou leiloa lo latou valaaufina, ma ua se'e ese, po ua leiloa le ala sa'o e savavali ai. Auā o lo latou tuliloa o le mea ua latou talitonuina, o lo latou faaletonu lava lea, ma toe foi atu i la latou galuega sa masani ai muamua, ma le manatu, na pau lea o le ala e lagolago ia i latou ma lo latou ola.

Peitai, ua tatou iloa iinei le alofa le tuulafoai o le Alii, lea ua toe afio mai e toe faalauiloa la latou feau e fai; ma o lana fesoasoani

foi, sa toe tosaina mai ai i latou ia te Ia. Sa latou maua se aui'a tele, e ala i le faatasi atu i ai o Iesu ma ina ua latou omai i le matafaga, sa valaaufina ai e Iesu e omai e aai. O Iesu e faamagalo, sa faatali foi e avatu ia latou meaai faale-tino, atoa ma meaai faale-agaga. Auā sa ia avatu le i'a ma le falaoa, o le toe faamanatuina o le sakarameta, ua latou toe mafaufau ai ia Iesu ma i latou. O lo tatou auai faatasi ma mafuta faatasi ma Iesu, o lo tatou i ai lava lea i le ala sa'o.

Fanau ma tatou uma, e leai se isi ala sa'o e ese mai ia Iesu. Tatou te punonou lava i tiute ma faiva ua valaaufina i ai i tatou, e pei o so'o o Iesu, ae ua uma ona ia mamanu ma faataoto le ala sa'o tatou te savavali ai. Afai ua e sēsē ese, toe foi ia Iesu, o le ala sa'o ia. Iesu na ia osia le taulaga o le faaolataga mo le lalolagi, o le ala e tasi e faaoalaina ai, e ala i le faatuatua.

GALUEGA FAATINO: (Mafaufau fetāla'i i le Tusi Paia)

O la tatou mataupu o le aso; E amata i le lelei, ae te'i ane ua leaga, ae mulimuli ane ua toe lelei foi.

- Faamatala mai se tala o e iloa i le Feagaiga Tuai, ma se tasi mai le Feagaiga Fou, o aliae ai le laasaga e pei ona taua i luga (Lelei – Leaga – Lelei)
- Le afaina pe ua galo ia oe le Tusi, pau lava le mea taua, o e iloa se tala, ona ta'u mai lea ae faapu'upu'u.

Fesoasoani lau susuga i le Faiaoga i la tatou galuega faatino.

- (eg) (i) Tavita (lelei) - oti o Uria (leaga) Tautala i ai Natano, ona salamo lea (lelei)
(ii) Onesemo (lelei) – sola ia Paulo (leaga) Toe faafoi mai ia Filemoni (lelei)

PESE: 385 “O ai ea lo tatou ola?”

A'OA'OGA:

1. Tumau ia Iesu le ala moni.

2. O Afioga a le Atua, o le sulu ma le malamalama i o tatou ala.
 3. Vaai lou vae i tuia, i le ala o e ui ai.
-

ASO SA: **23 APERILA 2023**

MATAUPU: **IA AOFIA AI, MA Ē E LE O FAITAULIA AI**

SINI: Ia a'oa'o tamaiti ia latou iloa le taua o le toe fetu'utu'unai, ina ia mafai e le tagata ma'i ona malolo, ma aofia ai i le sosaiete o e malolosi.

TUSI FAITAU: Luka 5: 17 – 26

FESOASOANI MO FAIAOGA:

O le tala lenei i le tagata ma'i pipili, po o le supa, lea tatou te iloa tele ai. O le tala foi ua malamalama lelei i ai le toatele o tatou, ae maise le auala sa sailia e le au sii ma'i, e vave ai ona oo le ma'i ia Iesu. O le itu lea o fetalai ai Iesu i le au sii ma'i, o latou o tagata faatuatua. O le gaoioiga lava la lea sa faia i le au sii ma'i, o aumai ai foi le faatāua, e fai ma auau po o le autu o la tatou mataupu o lenei Aso Sa.

O le tāua o le toe fetu'utu'unai, ma le toe suia o le faatatau masani na omai ma latou. Auā e tasi lava le mea sa tulimata'i, o le ū lea e fata le tagata ma'i ina ia oo ia Iesu e malolo ai. Ae o le le faigofie ona maua o so latou avanoa i le Alii, ona o le tumu tele; sa toe suia ai e le au sii ma'i le tonu, ma fetu'unai loa, o le a latou feac'i i luga e tala se apa o le fale, ina ia mafai ona vave oo ifo le ma'i ia Iesu. O le tagata ma'i lava ia, e le o faitaulia i le toatele o le sosaiete o malolosi, i latou e tula'i lava latou ma o

i le Alii, e pei ona faia e le toatele o le sosaiete. Ae o le tonu ma le fetu'unaiga ua faia nei e le au sii ma'i, lea ua malolo ai le ma'i ina ua oo ia Iesu, lea la ua aofia ai foi ma le tagata ma'i, sa le faitaulia i le au malolosi, ina ua faamalolo e Iesu, ma faigofie ona au faatasi ma le lautele o le sosaiete.

O le uiga lea o la tatou mataupu e pei ona fai atu; "IA AOFIA AI, MA Ē E LE O FAITAULIA AI," a'o faatāua ai le toe fetu'utu'unai, ma le toe faavasega lelei. Auā o le tala, o aumai ai i o tatou tagata ma o tatou aiga se tasi feau taua; e tatau ona tatou toe fetu'utu'unai ma toe faavasega lelei faavae po o faiga ua tatou masani ai; E taua tele i o tatou aiga ma le Ekalesia. E pei o le upu faamuagagana a le atunu; "O le uta a le poto e fetala'i, a o le vale e taofiofi mamau." Auā, e pei ona tala e le au sii ma'i apa o le fale, o faapena foi ona valaau le Atua ia tatou, tatou te aveese a tatou mea masani o faalavelave mai, tu ma agaifanua, talitonuga, aganuu, o faalavelaveina ai le galuega a le Alii. O finagalo foi le Atua tatou te oese mai faiga masani ua tatou iloa, ina ia oo atu i e latou te le o iloa, ni faiga fou e aumai ai tagata vaivai, matitiva ma mama'i i le Alii, ina ia faamaloloina atoatoa. O le tete'e o i latou oi le vaega mulimuli o le tala, f 21 – 26, o le faailoga o lo latou ola tutumau ma le lē fia ū ese mai faiga ma talitonuga ua latou masani ai.

O le galuega faamalolo o aofia ai le faamalosia e tutu faatasi i le galuega. E tatau ona tatou faamaonia mafuaaga ma faataua, ina ia maua le filemu, ma aumai faatasi le iloa o le Talalelei i aiga ma Ekalesia. Fanau, 'aua le vaai maulalo ma lafoai o tatou uso mama'i ma vaivai, ae tatou taumafai e suia o tatou olaga, ma aumai i latou i totonu, e ala i le ave ia Iesu e malolo ai, pei foi o tatou. Iesu sa ia osia le taulaga faaola mo tagata uma lava e ala i le faatuatua, ae le na o se vaega.

GALUEGA FAATINO: (Taliga Fesili, fa'aaoga lau Tusi Paia, ae fautuaina lou tali mai faamataupu silisili, e tus o lou iloa ma lou faatuatua.

1. Pe afai o lea ua molia e le aiga o e ona le fale le au sii ma'i, ona o lea ua tala apa o le fale, ae le'i faano. O Iesu o fai ma molimau.

(i) O le a sou iloa, o fea le itu e tu ai Iesu, o le aiga po o le au sii ma'i?

(ii) Faamatala lelei mai le mafuaaga o lau tali.

Tali: (i) O le au sii ma'i.

(ii) Ona e taua i le Alii le ola o le tagata. O le fale, e mafai ona toe faatau e le au sii ma'i ni apa fou, ma toe o atu e ato le fale.

2. (i) O le a sou iloa, e tutusa le finagalo o Iesu o taua i le fesili muamua, ma le lagona o le au sii ma'i?

(ii) Ta'u mai se faamaoniga o lau tali mai le Tusi Paia.

Tali: (i) E tutusa

(ii) O le faataua e Iesu o le ola, o le mafuaaga tonu lena na fai ai e le au sii ma'i le tulaga lea. O faamaonia i le fetalaiga a Iesu o i le f.20. "Ua silafia e Iesu lo latou faatuatua...."

3. O ai le tagata sa le faitaulia, pe sa le aofia i le sosaiete e tusa o le Mataupu ma le tala sa faitauina?

Tali: O le tagata ma'i supa.

4. E lelei le fetu'utu'unai o faaiuga, pe lelei a le tamau ma tumau pea?

Tali: E lelei le fetu'unai, e fua i le taimi ma le manaoga, ae maise le fia faaolaina o lē ua mafatia.

PESE: 120 Vave maia outou uma
(fati: Pese 119, 121, 122)

A'OA'OGA:

1. E agalelei le faatuatua.
2. E tutusa tagata uma i le finagalo Alofa o Iesu.
3. Taumafai e aumai tagata uma i le Alii e ou le ola.

.....

ASO SA: **30 APERILA 2023**

MATAUPU: **E TELE ITU TINO, AE TASI LAVA LE TINO**

SINI: Ia a'oa'o tamaiti ia latou iloa, e eseese tagata, a o itu tino uma lava o le Ekalesia a Keriso.

TUSI FAITAU: 1 Korinito 12: 12 – 26

FESOASOANI MO FAIAOGA:

E leai a se tusi e aunoa ma sona mafuaaga. O si faaletonu sa alia'e mai i le Ekalesia i Korinito; Ua faavasega e tagata le Ekalesia i tulaga faale-tino; ua fua i le taualoa, le agavaa, le tomai, ma isi tulaga, ae tupu ai le feva'eva'eai ma le lē mautu. Le pogai la lea o le tusi, e faatonu ma faasa'o ai le mea ua tulai mai, e le gata la mo le Ekalesia i Korinito, ae e fai foi ma taiala i so o se Ekalesia lava. Ona fa'aaoga ai lea e le Apostolo le ata lea o le tagata ma lona tino atoa, ae tele ona itutino eseese e pei o vae, lima, mata, ulu, ma isi ua silafia. O lo o fa'aaoga e Paulo le ata lea, a o lona manatu o autu i le itu faale-agaga o le Ekalesia. Aua o le tino o Keriso i le lalolagi, o le Ekalesia lea. O le Ekalesia, o le faapotopotoga o tagata uma lava e talitonu ia Iesu, e tasi lava, e le lua ni tino o Keriso po o ni Ekalesia. O le mea mautinoa, e eseese tagata o i totonusi o le Ekalesia, o isi e tele meaalofa a le Atua o i ai; o isi e taualoa i tulaga tau agavaa ma le iloa; ae i ai foi i latou e vaivai ma faatauvaa meaalofa o i

ai. O le manatu la o le Aposetolo, e le faavasegaina ni taualoa, ni agavaa, ma ni maualuluga i totonus o le Eklesia. Auā o le tino o Keriso o lana Eklesia lea, e tasi lava ae aofia ai tagata talitonu eseese uma lava. E le mafai ona fai mai le mata i vae, e leai so oulu aoga. Manatua a vae mutu tulou, ua le atoatoa foi le tino ma lona tulaga e tatau ona i ai. ‘Aua la le manatu faatauvaa i tagata vaivai, aua pe vaivai lava, o le itutino lava o le tino atoa; afai ae le i ai, ua le atoatoa foi le tino. O le manatu la o le Aposetolo, pe eseese a, ae o le galulue fegalegalea’i faatasi, ma tau fai fesoasoani i ai, mo le mautu ma le lelei o le Eklesia. Ae ‘aua le faavasegaina ni aoga ma ni taua, aua e vevesi ai ma le mautu. O le Talalelei sili lea, o le galueaina faatasi o le faia lea ia malosi ma lelei ma le Atua, ma le isi ou uso a tagata. O tatou o le tino e tasi, ae eseese itu tino; O le maopoopoga i totonus o le eseesegea. (Unity in diversity). E tatau ona alofa le tasi i le isi, le afaina lo tatou eseese. O le mea lea, tatou tau fai fesoasoania’i, le afaina le lanu, aganuu, tupuga, tamaoaiga, ina ia maua mai ia tatou le mea sili.

Fanau, manatua na faia tatou e le Atua e eseese uma lava, ae lei faia tatou ina ia faanofoesea. O tatou uma o itu tino eseese o le Eklesia a Keriso. E agasala foi le lalolagi uma, ae tasi lava le Taulaga o le Faaolataga mo tagata uma, na o lea na faia o Iesu le Keriso.

GALUEGA FAATINO: (Fefaatusatusaiga: Analogy)

Taatia le Eklesia, ae taulai lau faatusatusaga i le itu faale-tino, ona e tago lea e faamatala faapupuu mai, le sa’o o le ata lea a Paulo e fai i le tino ma ona itu tino, pe a fua i se laau o le vao.

PESE: 154 “Lo’u lava Alii e, o oe lou Matai”

A’OA’OGA:

1. ‘Aua le manatu faatauvaa i le isi uso a tagata.

2. E taua tutusa tagata uma i le Alii.
 3. Tatou atia’e faatasi le Eklesia a Keriso.
-

ASO SA: *7 ME 2023*

MATAUPU: *O FAAOSOOSOGA O IESU*

SINI: Ia a’oa’o tamaiti ina ia latou iloa, o faaososoga e luitauina ai lo latou tutumau i le Alii.

TUSI FAITAU: Mataio 4: 1 – 11

FESOASOANI MO FAIAOGA:

O faaososoga o Iesu, e tele a’oa’oga taua ma aoga mo le tagata ma lona ola; e pei o lona manumaloina o faaososoga, le fa’alia o lona usiusitai, ma isi e tele. Ona o Iesu foi o le Alo o le Atua, ‘aua nei o tatou manatu, o lona manumalo o le fa’aliga o lona natura mafai, ma lona malosi i so o se mea. Auā o la tatou faitau faa-le-tagata, ona o Iesu o le Alo o le Atua, e le mafai ona toilalo i se mea. E sa’o, peitai, o fia tuliloa i le vaaiga aoao tetele e pei ona moomia ma tuliloa i le sini. O le taua ma le aoga o faaososoga o Iesu mo tatou, o auala mai ai le fesoasoani a le Atua, ina ia tatou malamalamā ma iloa ona ala e le vaaia, ae ia puipuia tatou ma aumai ia i tatou mea o tatou moomia i lenei lalolagi. O lona uiga, ia tatou vaavaai loloto i faaososoga o Iesu, o ni lu’i, ina ia tatou tutumau i le Alii i avanoa ma suiga tau faasese o lenei lalolagi, ae maise taimi ma’alea’le o le mana’o vave, ma le fia faamalie o le mana’o.

O le faaososoga muamua o Iesu, ma lana tali, o se fofo tulaga ese lea e foia ai se faafitauli. O le taimi faigata o le mana’o i se

meaai, ona ua fasefulu aso e lei taumafa. Sa fautuaina ai e satani le Alii, e fa'aaoga lona mafai faa-le-Atua, ina ia maua mai mea o moomia (meaai) e faatumau ai pea le ola i le lalolagi o i ai. O le tali atu a Iesu i le tiapolo po o satani; O le maua o mea uma o tatou manatu e aoga mo le faatumauina o le ola i le lalolagi lenei, e leai ma se afaina e tasi o i ai i lea mea. O le Atua e ou mea uma, e le mativa pe na te moomia se mea e tasi. O le faaososoga e lua, o lo o lu'iina ai e le tiapolo le mafai ma le pule a le Atua, e ala i lona mana'o; Ia oso i lalō le Alii. E tutusa a lena ma lo tatou fai atu ia Iesu, pe ana o tatou, e fai so o se mea o tatou loto ai i le Alii e fai. O le tali a Iesu, ia tatou iloa – E leai se tagata ola e toatasi na te faatonua le Atua, ae tatau ona faamaulalo le tagata, ma ia talia se mea o faatonu mai e fai. O le faaososoga mulimuli, ua ofoina atu ai e satani le mamalu uma o le lalolagi i le Alii. O le mea ia iloa, na pau lava mea e mafai ona ofo atu e satani, na o mea faa-le-tino. A o le ola, le filemu, ma le faaolataga, na te le mafai lea. E ofo atu e satani le tamaoaiga, fiafia faa-le-lalolagi i e latou te teena ma liliuese mai le Atua. O le tali a Iesu, e tatau i so o se tagata ona siilima i le Atua o le lagi na o Ia lava, le na ia foafoa mea uma, faatumau ma foai mai mea uma, ma o Ia foi o le puna o mea uma. Na pau lava le mea o finagalo ai le Atua mai ia tatou, o le ava ma le vivii atu.

Fanau, o tāua loloto na o faaososoga o Iesu ua a'oa'oina ai tatou. 'Aua nei taitaiina ese tatou mai le Alii, i ni avanoa ma ni suiga o lenei lalolagi. A ia tatou talitonu ma faatuatua ia te Ia, o le puna o manuia uma lava. Pei foi ona maliu ai Iesu ma toe soifua mai, ina ia ola tagata uma e faatuatua i le Atua.

GALUEGA FAATINO:

1. Mafaufau loloto i lou lava tama ma lou teine talavou, po o a ni mea o faaososoina ai pea oe e le tiapolo. Mafaufau foi i ni taunuuga lelei pe leaga foi e te oo i ai, ona fua lea i ai, o lou talaina ma lou teena.

- O lenei galuega faatino, ua na o se faamanatu mo le tamaitiiti lava ia, e mafaufau lelei ma teu i lona loto, mo se manuia mo ia lava.

PESE: 363 “Ia susulu atu o i tatou”

A'OA'OGA:

1. Aua nei se'etia oe i le tiapolo.
 2. Tumau i le Atua.
 3. Ia malosi le faatuatua i taimi e luitauina ma faaososoina ai.
-

ASO SA: **14 ME 2023**

MATAUPU: **O LE LOTOTELE E LU'ITAUINA AI**

SINI: Ia a'oa'o tamaiti ia latou iloa, le taua o le lototele e lu'i faiga masani, mo se lelei.

TUSI FAITAU: Mareko 5: 25 – 34

FESOASOANI MO FAIAOGA:

O le tulafono a Iutaia e pei ona tā'ua i le Levitiko 15: 25 (ff), O lo o aafia ai le fafine puna toto lea, e le o se tagata mamā o ia; ma so o se tasi e pa'i i ai lea fafine, pe pa'i foi i le fafine ua ta'u le mamaina foi lena tagata. Ae o le pāpātutu'i lea sa tatou faitau nei e tusa o la tatou tusi faitau, e le'i vaoia ai le pa'i atu o le fafine ia Iesu; po o le paia foi o lenei tinā e se isi. Sa fa'aalia le matuā lototele o le fafine e sau iā Iesu. Ua tatou iloa i le tala, ua tele tausaga o aafia lenei tinā i lea ma'i, ua tele foi lona

tamaoaiga e fa'aalu i isi foma'i ona o lona fia mapu, ae le'i mafai lava ona malolo ai. O lona faalogo la i le tala i le tagata e suafa ia Iesu, o le foma'i logologoa i so o se ituaiga gasegase, o lea na ia tulai ai loa ma alu e saili ia te Ia. E lei manatu lava le fafine e faamaasiasi se tagata ona o ia, pe faatauvaleaina foi le Alii, i lenei tumutumu. Ae sa na o lona naunau lava, ia tini ma taunu lona faamoemoe faalilolilo. Ioe! O lea lava sa pa'i atu i laei o le Alii ma malolo ai! Ma o le uiga lea o la tatou mataupu o lenei Aso Sa; Tiga tulafono ma aganuu ua masani ai le sosaiete o tagata Iutaia, na lototele le fafine e sosofa, ona o le moni o lona talitonuga, e malolo pe a pa'i iā Iesu, tusa lava pe na o lona laei e pa'i i ai. Ae o le mea ua fai e lenei tinā, ua fai lea ma lu'i taua i le soifuaga o tatou i ai foi tatou. Auā o le tele o tapu ma vavao, ua fai ma pa pupuni, ua punitia ai tagata mai lo latou talitonuga, i se mea sili aemaise lava le talitonu i le Alii le Faaola o tagata uma.

Sa manatu le tinā na te tuua le tumutumu e aunoa ma le iloaina o ia e se tasi. Ae sa silafia e Iesu o ia, ona sa lagona e le Alii ua alu atu lona mana; ona saili ai lea ma iloa o le fafine. Ona tautino lea e le fafine i le Alii o ia, ona ua mata'u. Peitai, sa silafia e Iesu le tulaga ese o le faatuatua ma le lototele o lea tinā, ma le lu'i ua ia faia, ma o le ala lea o le manatu o le Alii i lona lava finagalo, e le tuua lenei mea ua tupu e aunoa ma le silafia e tagata. Auā o le fesili atu o Iesu, ina ia matua tautino mai i le faamaoni, lea na tulai mai ai le tinā ma tautino i le Alii. Sa fa'aalia le lototele o le tinā e sau i le tumutumu o tagata, ina ua ia manatu e le tatau ona tusiesea o ia mai le olaga masani. I le ma le isi, sa sau lava e fetaia'i ma le tumutumu, e ui lava o lo o ia popole ma gatete. A o i ua ia maua ai le faatagana mai le Alii, "E alu ai ma le filemu," auā na te lei faia lava se mea leaga e tasi. A o lona lototele e lu'i le aganuu ma faiga masani, lea ua malolo ai.

O le lu'i lea mo le itufale vāivāi o tinā e tusa o lo latou Aso Sa lenei, ai o le lui aoga tele mo outou le fanau ma tatou uma lava. Aioi i le Atua e aumai iā tatou le lototetele ma le malosi, e lu'i ai

faiga masani ma faavae, o punitia ma taomia ai le mea moni ma le Alofa o le Atua; ina ia maua e le toatele le saolotoga ma le olioli moni mai ia te Ia. Le olioli silisili i le Alofa Tunoa sa faia e Keriso e ala i le Taulaga o le Faaolataga.

GALUEGA FAATINO:

Ta'u mai ni tulafono po o ni faiga masani se lua, o e iloa o saisaitia ai oe i totonusi o lau aoga, po o lou nuu, po o lau Ekalesia foi; Ma ta'u mai ni ala tatau ua e manatu e tatau ona lu'i ai ia tulafono, ina ia e maua le mea sili mai le Alii.

PESE: 152 "Iesu e malie loto.."

A'OA'OGA:

1. Faatuatua i le Atua e te ola ai.
 2. Lototele e sue ia maua le Alii.
 3. O Iesu o le foma'i e le totogiina i ni tupe.
-

ASO SA: 28 ME 2023

MATAUPU: *Ō FAATASI PEA MA IESU I TAIMI UMA*

SINI: Ia a'oa'o tamaiti ia latou iloa le taua o le ō faatasi ma le Alii, i taimi uma o le ola.

TUSI FAITAU: Mataio 14: 22 – 33

FESOASOANI MO FAIAOGA:

Ia mautū pea i o tatou manatu faiaoga, a o faamatala i tamaiti la tatou mataupu. O le uiga loloto o le, “ō faatasi ma Iesu iinei,” e le o le fuifui lua i le tino i taimi uma, a o le loto ia faatuatua ma tumau i le Alii, ae le o le manatu ua e mafai e oe lava, auā e foliga faapena le mea o tupu.

O le tala masani e pei ona faamauina i tusitusiga a le aufai-Evagelia. O le vavega e tusa o le tala a Mataio, safafagaina ai e Iesu tagata e 5000 i le matafaga, o se faamanatu taua i le au-so’o, i lo latou ola talitonu ma tutumau ai i le Alii i le faatuatua. Ua tu’u atu le au-so’o e malaga i le va’ā, a o Iesu sa muai saili malosi i lona Tamā, e ala i le tatalo. O le toe taliu atu o Iesu iā i latou, o lo o taua, sa savali atu i luga o le sami. Ua malosi le matagi ma ua siisii le au peau, a o savali atu Iesu, peitai, latou te le’i talitonu o Iesu lea e savali atu, ae ua masalo o se aitu. Sa fetalai atu Iesu e uiga i lo latou le faatuatua, auā ua latou fefefe, ma tautino atu lava, o Ia o Iesu. Ona ofo lea o Peteru e alu atu, pe afai e moni, o Ia o Iesu. Peitai, o lona goto ifo i le sami, ona ua aveese ona mata mai le Alii. O le luitau lea, auā o Peteru, e faatuatua iā Iesu, na te iloaina foi, na te mafaia so o se mea ona fai, pe a faataga atu e Iesu. O le ala foi lena o lona mafai ona savali i luga o le sami. Peitai, e foliga ua ova lona lagona mautinoa, ma manatu ai na te mafaia so o se mea na o ia lava. Lea la ua le vaai iā Iesu, ae ua vaai i le matagi malosi, ae ua fefe ai. O le fefe lea na mafua ai ona goto. Ae ui i lea, sa finau pea ma alaga atu, “Alii e, faaola mai” Ona aapa atu lea o Iesu e taofi ma avea’e ia te ia i luga, ma fetalai atu loa i ai Iesu i le taimi lea, “O oe na lē faatuatua itiiti, se a le mea ua e masalosalovale ai?”

Tatou te gogoto foi i le tele o taimi, pe a fetaia’i ma faafitauli lo tatou faatuatua, ma toilalo ai, talu le fefe ma le palaai. Manatua, o soifua pea le Alii, o i ai faatasi ma tatou, e vave pa’i mai e lavea’i i tatou, tusa lava pe ua lusi lo tatou faatuatua ia Ia. Fanau, tatalo e aumai lo tatou faatuatua e savavali faatasi ai ma le Alii i taimi uma, ma aumai lo tatou mautinoa pe a tatou pauu ma gogoto ifo. O le gogoto ifo foi o le lalolagi ona o le agasala,

sa toe faaolaina uma e Iesu i le taulaga sa Ia faia, e ala i le faatuatua, ma ō faatasi ai pea ma Ia i le ola nei.

GALUEGA FAATINO: (Taliga Fesili)

1. O le fuaiupu e 25 & 26 o le tatou tusi faitau:-
 (i) O le a sau faitau i ai, na iloa e le au so’o o Iesu lea e savali mai luga o le sami pe leai?
 Tali: Sa latou iloa o Iesu, o lo o tautino mai i le f.26. “Ua iloa mai e le au-so’o o ia o savali i luga o le sami.”
 - (ii) Ae aisea la na latou toe faapea ane ai, “o le aitu?”
 Tali: O le lē atoatoa o le talitonu i le mafai o Iesu; o lona uiga, e le o faatuatua ia te Ia.
 - (iii) Na mafua i se a lo latou le talitonuina o Iesu moni lea, a o lea sa vaai atu i ai o Iesu?
 Tali: Na mafua i le masalosalo, ona latou te lei vaai muamua i se tagata e mafai ona savali i luga o le vai.
2. O le a le upu o i le f.30, o ta’u mai ai le lē faatuatua atoatoa o Peteru ia Iesu?
 Tali: O le “fefe”
 3. Ana vaai Peteru i le matagi malosi ae le fefe ai, semanū o le a le mea e tupu?
 Tali: Semanū e le goto i lalo; auā o le faailoga lena o lona faatuatua, ma o lo o ō faatasi ma le Alii, tusa lava po o la e vaai i le matagi.

PESE: 231 “Ia tiai ia le fefe”

A’OA’OGA:

1. Ia tumau faamaoni le talitonu ia Iesu.
 2. Oe i goto i le leaga, talu lou faatuatua itiiti.
 3. Ō faatasi ma Iesu e manuia ai.
-

MANATU TA'IALA O IUNI: E PULE AAOAO LE ATUA I TOFIGA.

E i ai le talitonuga, o lo tatou ola e pule aoao ai le Atua, e oo lava i lona fa'aaogaina i tiute ma faiva eseese. O tofiga lava ua ia tapena mo le manuia o lana fanau. E faapena i tatou le fanau, ia tuu lo tatou ola e pule ai le Atua i lona fa'aaogaina ma ia o faatasi ma le tatou tatalo ina ia tatou malamalama i lana faasinoga mo i tatou.

ASO SA: **4 IUNI 2023**

MATAUPU: **O LE VAAI FA'A-LE-TAGATA**

SINI: Ia malamalama le vasega, o tofiga e fai i le vaai faa-le-tagata, e i ai taimi e le tonu ai pe le sa'o ai fo'i lona faatinoina, e faaituau, e vaai maulalo fo'i, ae peita'i o le Atua ma lana silasila e faia i le faamaoni ma le alofa..

TUSI FAITAU: 1 Samuelu 8: 19 – 22

FESOOASOANI MO FAIAOGA:

Faatalofa atu i le tatou vasega i lenei taeao fou aemaise o le Aso Sa muamua o lenei masina. Faafetai i le Atua i lana puipuiga ua tatou aulia ai i le filemu le afa o lenei tausaga o la tatou savaliga, ae o lo o manuia i tatou uma i lana ta'ita'iga, i lo outou soifua ma

so matou ola. O le mataupu o lenei taeao ua faaautu e faapea: **O le vaai fa'a-le-tagata.**

O le a le uiga o le upu - vaai faa-le-tagata? Ia ua lelei, a talanoa loa i le upu vaai faa-le-tagata, o lona uiga o lagona ma manatu faapito o le tagata, o faaiuga e le atoaatoa ona fai. Aua foi o le tagata e le atoa, e i ai lava vaivaiga. E le faamaoni, e vaai maulalo, e faaitu'au, e fua lana faaiuga i le tino mai o mea i lana vaai. O le ala lena e tele ai ina le manuia nisi o tofiga e faia e le tagata, ona ua ia fua i lana vaai ma lona iloa, ae le silasila toto'a ma faia i le faamaoni e ala i le faalagolago i le musumusuga a le Agaga Paia.

O le mana'o o Isaraelu ia fai so latou tupu ia pei o isi malo, e faamasino, ma muamua i o latou luma, o se mana'oga na le logo lelei i le faafogaga a le Atua. Aua o le fai o so latou tupu, o le ata vaaia lava lena o le teena o le Atua. Peita'i na talia lava e le Atua. O le tofiaina o Saulo, o le tali lena mo le mana'o o le nuu, ae o lo o manino ai fo'i le matamata tetele o filifiliga e faia i le vaai faa-le-tagata. O tofiga ua manino ai le sese o filifiliga ua faia e le tagata, ua galo le Atua o le pogai o faamanuiaga ma manuia o Isaraelu.

O lea ua uma ona ta'u i ai e Samuelu tuutuuga ma le va feagai ai ma le tupu, peita'i ua le mafai e le nuu ona faalogo i ia upu. Ua fetala'i fo'i le Atua ia Samuelu, ia usiusita'i i o latou upu.

Mo tatou le fanau, aua le faia a tatou filifiliga e fua i lo tatou iloa ma le malosi. O le saili o Isaraelu o so latou tupu o le faailoga o le o ese mai le Atua, o le ata vaaia o puapuaga ma malaia o le a feagai ma le nuu.

O le tagata lava ia e le atoaatoa, peita'i o le tagata e faamoemoe ma faalagolago ana faaiuga i le Atua e ala i le musumusuga a lona Agaga, e mautinoa e manuia. A e faia loa i le fia malosi ma le poto o le tagata, e mautinoa lava e iu vale e le manuia. Ia tumau i le Atua o Ia o lo tatou Tupu, o le ta'ita'isili tatou te malu ma manuia ai.

GALUEGA FAATINO: Faatalanoaga

Faasoa le vasega e uiga i le autu ma lona aafiaga i le soifuaga o lo o tatou ola ai i aso uma. O a ni auala taua e foia ai le vaai faa-le-tagata?

PESE: 82 (Pese ma Viiga)

A'OA'OGA:

1. Ia tumau i le Atua.
 2. O le Atua o le Tupu e sili i tupu uma lava.
 3. E le i'u lelei le vaai faa-le-tagata.
-

ASO SA: **11 IUNI 2023**

MATAUPU: **MALAMALAMA UIGA ESE**

SINI: Ia malamalama le vasega o le malamalama sili o le Atua na te taia le pogisa o le tagata ina ia fai ma ana auauna.

TUSI FAITAU: Galuega 9: 1 – 9

FESOASOANI MO FAIAOGA:

O le ola faufau, o le ita faamoemoeina ma le ola fia taui ma sui o Paulo i le au-kerisiano, lea na afua ai lava ona ia alu e saili le au faatuatua i so o se vai panoa o Ieruslema ina ia sasa ma molia. O le mauluga o lona aoaoina i tulafono, o a'oa'oga ma talitonuga faa- Iutaia lea na afua ai ona alu. Ua alu ma le faamauluga i lona atamai ma lona malamalama e taumafai ai e vaoia ma tineia le Talalelei e uiga ia Iesu Keriso ma lona malo.

O le malamalama uiga ese, ua faatusaina i se pupula malosi, pupula mata'utia, vaaiga uiga ese ma le ofoofovogia. O le tala na

faitauina o le taimi o le sauaina o le au kerisiano ona o le pogisa pea o loto ma agaga o tagata ona o le Talalelei ia Iesu Keriso. I le fuaiupu muamua o le Galuega e 9, o lo o faamatalaina ai le ita, po'o le tiga o Saulo i le faamata'u ma le fia fasioti i le auso'o a le Alii. Ua ia aioi ma faatoga i le au ositaulaga sili i tusi e ave i sunako i Tamaseko ina ia fusifusia ma saisai i latou uma o tane atoa ma fafine o lo o ta'uta'u le suafa o le Alii.

O manatu ma ala o le tagata e le faatusaina i le finagalo o le Atua. Aua o le Atua e mata'utia, e leai, leai lava se tasi e tusa ma ia. O le alu malaga o Saulo i le ala i Tamaseko. O i na, na ia molimau ai i le malamalama uiga ese e le i vaai muamua ai ona mata. O le susulu malosi mai o le malamalama ma ua taia ai le tagata manatu faapito ma le sau. Ua tauaso ua le mafai ona pupula ane ma vaai i le Atua ae ua na ona ia faalogo ia Iesu ma lona fetalai mai. O le loto sauua ua fusia i le alofa, aua ua lagona le salamo ina ua molimau i le silisilie o le Atua. O le faailoga o le feagai o le tagata ma le mamalu o le Atua. Ae o le malamalama o le Atua e faamalamalamaina ai le loto pouliuli ma le pogisa o le tagata e faasagatau atu ia te Ia ma lona malo. Mo tatou i le fanau, e gata lo tatou iloa ma le poto. E le mafai fo'i e le tatou malosi ona iloa mea uma. E sala ese fo'i o tatou mana'o i le lumana'i ma le fa'aaogaina o lo tatou ola e le Atua. Ae o le natura lea o le Atua o lo o tatou auauna i ai. O le Atua alofa ma faamagalo, na te suia o tatou tagata tuai, tagata na i le po uliuli ma le pogisa e avea ma malamalama e susulu atu ma tala'i lona finagalo. O le Atua na te faia suiga lelei mo lo tatou ola.

Uiga o Upu:

- | | | | |
|------|--------------|---|--------------------------------|
| i) | mapugatama'i | - | ita |
| ii) | a'a i tui | - | le talia, tete'e, le talitonu. |
| iii) | mafeganavai | - | le manava, le mautonu |

GALUEGA FAATINO: Fa'aaliga manatu.

Ia faamatala le malamalama uiga ese e pei ona i ai le tatou autu? ae o ai le malamalama uiga ese? Ae o le a sona taua mo i tatou i le feagai ai ma a'oa'oga ma galuega i le taimi nei?

PESE: 65 Pese ma Viiga

A'OA'OGA:

1. O le Atua o le malamalama moni lea.
 2. E le feagai le tagata ma le Atua
 3. O le Atua e faia suiga lelei mo lo tatou ola.
-

ASO SA: **18 IUNI 2023**

MATAUPU: **O AI EA OU TE AUINA ATU?**

SINI: Ia malamalama le vasega e pule aoao le Atua i le fa'aaoagaina o lo tatou ola mo ana feau.

TUSI FAITAU: Isaia 6: 1 – 8

FESOASOANI MO FAIAOGA:

Malo le soifua manuia ia te outou le fanau i lenei taeao. Faafeai i le alofa ta'ita'i o le Atua ua ia aumaia lo outou soifua ma so matou ola i le faaaauauina o la tatou mataupu o lenei Aso Sa. Ia fesoasoani mai le agaga o le Atua ia te i tatou.

O le vaega o le tusi o Isaia sa o tatou faitauina, o loo faamatalaina ai ni vaaiga uiga ese ma le mata'utia na iloa e le perofeta. O se vaaiga uiga ese ua lagona ai le faatauvaa o le tagata ina ua feagai ma molimau i le mamalu silisilise o le

Atua. Ua ia iloa lona nofoalii mamalu, faatasi ma agelu po'o serafi o lo o alalaga ma faapea ane “ e paia, e paia le Alii o 'au, ua tumu le lalolagi uma i lona mamalu.” O le silisilise lea ma le malumalu o le Atua ua maua ai le to'afilemu o Isaia e tali ai i le valaau a le Atua.

O ai ea ou te auina atu? O le fesili na fetalai ane ai le Atua ae o loo molimauina e Isaia le silisilise o le Atua i totonu o le malumalu. O le paia ma le mamalu o le Atua ua tumu ai le malumalu. O lea ua faavaai ma tapena ai Isaia mo lona valaauina. A to manatu i le valaauina e le Atua o Mose, e le i fesili le Atua, na fetalai sa'o lava le Atua ia Mose e alu e lavea'i lona nuu mai Aikupito. Peita'i o Isaia o lea ua fesili le Atua e pei ona i ai le tatou autu. A fua i le fesili, o ai ea ou te auina atu? Ua oge tagata ea le Atua, ua leai ni tagata sa Iuta ua tau saili ai se tasi? Peita'i e leai, e le o lea le finagalo o le Atua aua e leai lava se mea e faigata ia te Ia. O le fesili mai o le Atua, o le faailoga o le Atua e tuuavanoa. O le avanoa ua tuu mai e filifili ai le tagata i le tali atu ai i lona valaauina. A lea ua tali Isaia, “ O a'u lenei, ina auina atu a'u”. O le tali a le tagata ua ofo malie e ia lava lona ola e faia le finagalo o le Atua mo lona nuu. O le valaauina o Isaia ia tala'i le faaolataga i le malo o Iuta, ia salamo mai ia latou agasala ma toe fo'i mai le Atua. Ia latou mautinoa o le faaolataga e mai le Atua ae le o le tagata.

Mo tatou le fanau, o lo tatou tiute o le faia o le finagalo o le Atua i soo se ala e faaogaina ai i tatou. Ia tatou tali atu ma le loto maualalo, o lo tatou faatauvaa e faatamaoaigaina e le Atua. E faaaupegaina lava i tatou e le Atua mo ana feau. Ia tatou talitonu fo'i ma le faatuatua, o le Atua e mamalu lava ia. Ua tumu le lagi ma le lalolagi i lona mata'utia ma le silisilise. Ia tatto tali atu i le Atua ma le loto atoa, o le agaga atoa ma le malosi atoa.

GALUEGA FAATINO: Tusi mai fuaiupu i lona faasologa sa'o e pei ona i ai le Tusi Faitau.

Faauta, ua papai atu lenei mea i ou laugutu, ua aveeseina ai lau amio leaga, ua faamagaloina foi lau agasala.

O a'u lenei, ina auina atu a'u.

O ai ea ou te auina atu? O ai foi e alu atu mo i matou?

E paia, e paia, e paia le Alii o 'au.

O le tausaga na otu ai le tupu o Usia, ua a'u iloa ai le Alii o afio i le nofoalii silisili ma le maualuga.

PESE: 11 Pese ma Viiga

A'OA'OGA:

1. E silisiliese le mamalu o le Atua.
 2. E le tuulafoaina e le Atua ona tagata.
 3. Ia tatou tali atu i le Atua ma le faatuatua.
-

ASO SA: 25 IUNI 2023

MATAUPU: E TĀUA LE TATALO

SINI: Ia malamalama le vasega o le tatalo o le aupega a le tagata faatuatua e fesootai ai ma lona Atua.

TUSI FAITAU: 1 Samuelu 1: 8 – 15

FESOASOANI MO FAIAOGA:

E faatalofa atu ia te outou tama ma teine o le vasega matutua faapitoa. Faafetai i le alofa o le Atua ua tatou aulia mai le Aso Sa mulimuli o lenei masina i le manuia ma le filemu. O le tatou mataupu o lenei taeao ua faaulutalaina e faapea "E taua le

tatalo". E i ai se tama po'o se teine e mafai ona ia faamatala maia le uiga o le upu tatalo? Lelei tele.

O le tatalo, o se tasi lenei o auupega o le taua faaleagaga a le tagata Kerisiano- o le tatalo. O le fesootaiga a le tagata ma le Atua i la le agaga. O le tala sa faitauina i lenei taeao, o le tatalo a le tina o Hana i le Atua. O Hana o se tasi o ava a le tamaloa e igoa ia Elekana. Fai mai le molimau a le Tusi paia "o le pule a le Atua na le fanau ai o ia". O lona uiga o Hana e leai sana fanau. O le leai se fanau, o se luma lea i tu ma aga a Isaraelu, e tusitusi lima ma vaai maualalo iai tagata. O le mafuaaga tonu lea na afua ai ona alu Hana e tatalo i le Atua, ona ua tiga lona loto i le tau faifai atu o Penina le isi ava a Elekana ia te ia.

Ua ia alu ma faatoga atu i le Atua e ala i le tatalo. O le loto tiga o Hana ua ia le sailia lava se isi auala e taui ai le faifai mai o tagata ia te ia. O lea lava ua tonu i lona manatu, o le tatalo o le tali lea o lona faafitauli. Ua ia tauto ma faapea atu "Le Alii o au e, afai e te silasila mai i le puapuaga o lau auauna fafine ma e manatu mai ia te 'au ma e fo'ai mai i lau auauna fafine se tama tane, ona ou toe foa'i atu lea i le Alii i aso uma o lona ola, e le oo fo'i se tafi i lona ulu". Ua tatalo lava Hana i luma o le Alii, ua tautala lava o ia i lona loto.

O se fafagu taua foi lenei mo tatou uma le fanau, a tiga le loto i faafitauli, ia tatalo i le Atua. Ia ta'u i le Atua ou mafatiaga ma ia faamaoni ona tuu atu lou loto i le Atua e ala i le tatalo. Ia tatalo ma le faatuatua e tali le Atua i ou manaoga. A tatou tatalo ia faia ma le faamaoni ma le loto i ai, ia tatalo ma tautino o oe o le tagata agasala.

GALUEGA FAATINO: Faasoa manatu e uiga i le fesili.

1. E talia ea e le Atua tatalo uma?

Tali: E le talia ina e le Atua tatalo uma, ua na o le tagata e tatalo ma le faatuatua, tatalo ma galue faamaoni ma ta'utino ma le faamaoni ana agasala i luma o le Atua.

PESE: 122 Pese ma Viiga

A'OA'OGA:

1. Ia tatalo ma le faamaoni.
2. Ia saili i le Atua e ala i le tatalo.

MANATU TA'I ALA O IULAI: O LE ATUA FAIMALAGA

Malo le onosa'i ia te outou le fanau i lenei taeao fou. Ua tatou aulia i le manuia le masina lona 7 o lenei tausaga. O le soifuaga o loo outou soifua ma tatou ola ai e mafai ona faatusaina o se malaga, e eseese mea e tutupu ai i lea aso ma lea aso o lo tatou ola, tatou te ui i manuia, e tau fo'i la tatou folauga i faafitauli. O a lava mea e tutupu 'ua nei gallo ia te i tatou le fanau, e le tuulafoaina i tatou e le Atua o loo tatou faimalaga faatasi ma Ia.

ASO SA: **2 IULAI 2023**

MATAUPU: **UA TILIOLA ELIA**

SINI: Ia malamalama le vasega o le Atua e auai i mea uma, e oo lava i faigata ma faafitauli o lo o i ai faatasi lava ma ia.

TUSI FAITAU: 1 Tupu 19: 1- 9

FESOASOANI MO FAIAOGA:

O le olaga o loo tatou iai, e fesouaina lava i tatou i faafitauli i taimi uma ma aso uma. Tusa lava pe amio lelei, pe amio pa'a'a, pe sa'o pe sese fo'i, e le mafai lava ona alo faafitauli ia te i tatou. O taimi e vaivai ai le mafaufau ma faiaina ai i faafitauli ma puapuaga ona fusia lea o i tatou i le fefe ma le le mautonu. Peita'i ua a'oa'oina i tatou ia mau'aa le faatuatua ma ia tumau i le Atua pe'a oo mai aso vale o le olaga.

O le tatou mataupu o lenei taeao o lo o faamatala ai le tele o faafitauli e feagai ma le tagata. E tusa po o le a le mau'aa o le soifua faatuatua i le Atua, e tofotofoina lava i puapuaga. O lea fo'i na oo lava ia Elia o le preofeta a le Atua e le i alo ai fo'i faafitauli. E le'i lologo lelei i le faalogo a Elia tala ua ia faalogo i ai i le mana'o o Iesepela o le'a fasiotiina o ia. O le tala ua sola ai le faatuatua o Elia ae fusia i le fefe ma le popole vale. O le ala lea o le sola faasulusulu a le perofeta, ona ua mana'omia se fesoasoani, o le tagata ua fiaola ua leai se faamoemoe. O le uiga lena o le upu tiliola, o le tagata ua mana'omia vave lava se fesoasoani, ua leai se faamoemoe aua ua mautinoa lava o le oti le taunuuga. Ua ia alu ma faatoga i le Atua ina ia oti, aua ua fefe i le fafine amio leaga. Ua sola lava ma ua oo i le mauga o Horepa ma ua alu ifo i le ana ma lafi lilo ai. Ua Afio ifo le Atua i lana auauna filifilia e le o le mata'utia ma le malosi, peita'i ua na o sina leo malu ma le filemu ua faapea ane "Elia e, se a lau mea e fai iina?

O le fesili a le Atua o lo o atagia ai le lē tatau ia Elia ona lafi, auā o le lafi o lo o faamatalaina ai, ua leai se faammoemoe, ua le mautinoa le auai o le Atua i mea e tutupu o le ola. Peita'i o lea ua aumai se feau faamanatu mo tatou le fanau, a ua tatou alo i faigata ma puapuaga o le ola, ia onosa'i i tofotofoga ma ia mautinoa le auai o le Atua i mea uma.

GALUEGA FAATINO: Faasoa manatu.

Aumai sau faasoa o oe o le tama ma le teine o le vasega matutua. O a ni auala e tatau ona tatou faia pe afai e feagai i tatou ma puapuaga ma faafitauli o le ola?

PESE: 67 Pese ma Viiga

A'OA'OGA:

1. Onosa'i ma faamalosi e feagai ma lu'itau o le ola.

2. E le tuulafoaina i tatou e le Atua.

.....

ASO SA: **9 IULAI 2023**

MATAUPU: **O LE ALOFA E SILI I MEA UMA**

SINI: Ia malamalama le vasega e finagalo le Atua ia tatou ola i le alofa..

TUSI FAITAU: 1 Korinito 13:1 – 3

FESOASOANI MO FAIAOGA:

O le i ai o meaalofa o le agaga e pei o le faamalolo o ma'i, perofetaga, fai vavega ma isi lava meaalofa o le agaga, o le fa'aalia lava o le alofa o le Atua mo lana tagata, ae o se tasi o laasaga taua o le soifua galue i totonu o le Ekalesia. Peita'i ua faatusatusa fo'i e le tagata. O isi ua faapea, o le faamalolo ma'i e sili atu nai lo perofetaga, ia po o tautalala fo'i i agaga eseese e sili atu nai lo faamalolo ma'i. O vaivaiga ia faaletagata e afua ai ona fa'aaoga sese ia meaalofa. Ua fai ina ia saili ai viiga, ua saili po o ai e sili, ae ua le faia ina ia manuia ai tagata uma ae fo'i le viiga i le Atua o le na auina mai ia meaalofa.

O le Ekalesia i Korinito e tamaoaiga i meaalofa faaleagaga. Peita'i ua avea lea tamaoaiga ma ala o le fevaevaea'i o le Ekalesia. O le ala lea o le naunau o Paulo e tala'i atu ia Korinito, e le leaga le naunau i meaalofa faa-le-agaga, peita'i e iai le ala e sili atu. O le a le ala e sili atu? O le alofa. E masani ona tatou faauigaina le alofa i le agalelei mai o isi tagata, ia po o se galuega lelei fo'i e faatino mo e o moomia se fesoasoani. Peita'i e foliga e le faapea le alofa o lo o talanoa ai Paulo i le Ekalesia i

Korinito. O le ala lea o le faapea o le aposetolo afai e tautala i gagana a tagata atoa ma agelu, afai foi o ia te oe le faatuatua e aveese ai mauga, afai ou te tufatufa 'au mea e fafagaina ai e matitiva ae leai se alofa, e leai lava sona aoga ia te a'u.

O lona uiga e le o le mafai ona faia o ni galuega tetele i le vaai a tagata e iloa ai le alofa. O le alofa o lo o naunau i ai le aposetolo mo Korinito, o le alofa e atagia i le va feagai o tagata o le Ekalesia. Ia tupu le fealofani, le nofo lelei ma le fef'a'magalao'i e aunoa ma le ola faatusatusa ma faatupu o maseiga i le va o uso. O le alofa e afua mai le loto mama na te tausia le lelei, tausi le fealofani ma le feavata'i. O uiga lena o le alofa o lo o mana'o ai Paulo e ola ai le Ekalesia ina ia aveese ai le ola faatautava ma tupu ai fevaevaeiga i le Ekalesia. O le alofa, e le o le faailoa o ni mea ua e maua, lou poto ma lou atamai po o se tamaoaiga fo'i. O le alofa o le faaalia o le agalelei o le Atua mo lana fanau ia fealofani ma ola sa'oloto.

GALUEGA FAATINO: Tusitusiga.

Ia tusi ni fuaiupu se 5 e faamatala ai le uiga o le alofa i au lava upu.

PESE: E mana'o Iesu i le fealofani.

A'OA'OGA:

1. O le alofa e sili i mea uma lava.
2. E leaga le fevaevaea'i.

.....

ASO SA: **16 IULAI 2023**

MATAUPU: **PESE O LE MANUMALO**

SINI: Ia malamalama le vasega na pepese faafetai Israelu i le Atua ina ua manumalo mai faigata.

TUSI FAITAU: Esoto 15:1 – 6

FESOASOANI MO FAIAOGA:

E i ai le fuitau e masani ai e faapea “E mafai e le pese ona lauga, ae le mafai e le lauga ona pese” O lona uiga, e mafai e le pese ona momoli mai se feau taua ma faaleo lagona o lo o i le mafaufau o le fatu pese. E eseese lava fo'i mafuaaga e ala ai ona pese le tagata. E pese ona o le loto faafetai, e pese ona o le fiafia, pese ona ua lagona le sese, e pese ona ua faanoanoa ma le tele lava o isi mafua'aga.

O le tatou mataupu o lenei taeao, Pese o le manumalo, o le pese o le loto fiafia o lo o faamatalaina ai lagona o le faafetai ma le agaga vivii o Israuelu ona ua molimau i le silisilise o le Atua. O le pese o le manumalo ina ua tuvae i lauelele matutu o Moapi aua ua to'ilalo Aikupito, ma goto ane i le sami ulaula le autau a Aikupito ma a latou kariota.

O vaiga ia na molimauna e Israuelu ua afua ona saafi ma pepese. O le magoto ane o kariota a Aikupito i le sami, o le faailoga lava o le to'ilalo ma le faalumaina. O le fiasili ma le manatu faamaualuga o Farao lea ua ia molimau e silisilise lava le Atua. E leai se tasi e tu ma faasagatau atu ia te Ia. O le ala lea o le pepese o Israuelu aua o le alofa o le Atua ua ta'ita'iina i latou mai faigata. Ua pepese Israuelu ma faapea ane i o latou loto “Ou te pese i le Alii, aua ua matua manumalo lava o ia, o le Alii o lo'u malosi Ia, ua fai o ia mo'u olataga, o le Alii o lo'u tamā o le toa lava Ia, le Alii ua mamalu lou aao taumatau i le malosi, o lou aao taumatau ua nutipalaina ai le ua ita mai”

O le ofoofogia lea o le Atua ua taulagi e Israuelu ina ua latou mautinoa le maualuga o lona agalelei ma lona alofa lea ua ia faia mea sili mo lona nuu. O le Atua e auai mai i taimi e feagai ai le

tagata ma puapuaga o le ola. O le Atua fo'i na te le tuulafoaina lona nuu o Israuelu e pule ai le ua ita mai. O le Atua fo'i e finagalo ina ia maua e ona tagata le filemu ma le sa'olotoga. O ai la se Israuelu o le'a le pese o lea ua molimau i le faamaoni o le Atua ma lona alofa.

Le tatou vasega i lenei taeao, o le pese o le manumalo, o le pese fo'i e tatau ona tatou pepese ai. Aua a fua i le tele o faigata ma puapuaga e feagai ma i tatou, o le Atua lava e 'au ma i tatou. E le mafai ona ia tuulafoaina i tatou i mea uma. O le pese o le manumalo, o le pese o le faafetai ma le viiga e faafo'i i le Atua ona o mea silisili ua ia faia mo i tatou uma.

GALUEGA FAATINO: Tusitusiga

Ia tusi sau pese 2 fuaiupu e faailoa ai lou agaga faafetai i le Atua.

PESE: 92 Pese ma Viiga

A'OA'OGA:

1. E faia e le Atua mea silisili mo lana fanau.
2. E pule aoao le Atua i mea uma lava.
3. Ia iloa ona faafetai i le Atua.

.....

ASO SA: 23 IULAI 2023

MATAUPU: IA FAI SE MALOLOGA

SINI: Ia malamalama le vasega e taua le malolo e maua ai le malosi fou e fa'aauau ai feau ma valaauina.

TUSI FAITAU: Mareko 6: 30 – 32

FESOASOANI MO FAIAOGA:

O le faia o se malologa, o se faatinoga e tatau ma talafeagai mo tagata uma. Aua a gaioi ma galue pe a le tagata, e le tumau le malosi, e fai ifo lava i le vaivai. Peitai o le malologa, o le avanoa e mapu ane ai teisi e saili malosi, o le tino ma le mafaufau aua le faatinoina o feau ma galuega. E le gata i lea o le avanoa e toe timata ma toe vaai ai ni faaletonu o le galuega ina ia toe faia i sona taunuuga lelei ma le manuia. Tasi lea mafuaaga e ala ai ona ttau tuuaga i kalena faaleaoga, e le o se avanoa e tafafao ai tatou i le fanau, ae o le avanoa e tapena ai le mafaufau, ma saili le malosi e fa'aauau ai le aoga mo le isi kuata fou. O lona uiga o le malologa e le o le faamoemoe ona ua vaivai ma paie le tino e galue. Po o le malolo o le mafaufau e aunoa ma se manatunatu tatau. E leai, o le malologa, o le mapu ane ma le loto faafetai ma saili i le Atua le atamai ma le malosi e toe fa'aauau ai galuega. Ae saili faapefea?

I nai fuaiupu o le tusi o Mareko sa o tatou faitauina o lo o faamatalaina ai le toe fo'i fiafia ane o le auso'o ma le tala fiafia ma faamatala ia Iesu a latou galuega sa faatinoina. O tala o le manuia o le galuega na feagai ma le ausoo, aua ua to'atele temoni ua latou tulia, ma ma'i ua malolo. E ui i tala manaia ia o le galuega, ae na silafia lelei e Iesu e le faigofie le ala na uia e lona ausoo. Aua e lamatia le ola, e le gata o le malo o Roma ma lana puleaga, ae o isi fo'i o tagata o lo o te'ete'e ia Iesu ma ana a'oa'oga. O le ala o le fetalai ane o Iesu i lona auso'o, e o ifo i le vaa, e tau lava o i latou i se mea tuu fua, se'i tou mapu ane te isi. O le ta'ua e Iesu o le mea tuu fua, o lo o faasino i le nofoaga e mafuta ai ma le Atua. O le upu mapu, tasi lea upu e faamatalaina ai le upu malologa. O le mapu ane la te isi o le auso'o i le mea

tuu fua, o le faailoga lava lea o le o ane e mafuta i le Atua, o le malolo e momoli le faafetai i le Atua ona o lona Agaga na faamanaina ai le galuega a le auso'o ma le tatalo ia i ai pea le agaga o le Atua ia te i latou ma le valaauina. O le ttau lea o le malologa o lo o mana'o i ai Iesu i lona auso'o, ia mapu ane i se nofoaga tuu fua e mafuta ai ma le Atua. Ia tatalo ma le loto faafetai ona o lona alofa faatasi ma le faanaunautaiga ia fa'aauau lea agalelei i le soifua fa'aogaina mo ana feau ma galuega.

O se faamanatu lelei fo'i mo tatou le fanau. E ttau le fai o le malologa, ae o le malologa e mapu ane ua malie le loto i galuega sa faatinoina ona o le agaga mafuta mai o le Atua. E suamalie le malolo pe'a fai sa faia galuega i le filiga ma le faamaoni. O le malologa, o le avanoa ttau e saili ai le tagata ma le loto faafetai i le Atua. E leai se tagata e atoaatoa, o le ala lena e ttau ai le mapu ane i sou taimi avanoa e te mafuta ai i le Atua e maua ai lou malosi ma le atamai e faatino ai lou valaauina.

GALUEGA FAATINO: Faatalanoaga

Ia faasoa manatu o le vasega i le ttau o le soifua tatalo i le Atua. Ia faamalamalama i le vasega vaega tetele o le tatalo.

PESE: 122 Pese ma Viiga

A'OA'OGA:

1. E ttau le ola tatalo
2. Ia mafuta i le Atua i ou taimi avanoa
3. Ua na o le Atua e maua ai lo tatou malosi.

.....

ASO SA: 30 IULAI 2023

MATAUPU: O LE MALAIA O AIKUPITO.

SINI:

Ia malamalama le vasega o le Atua e pule aoao i mea uma lava na ia faia, o ia fo'i o le pogai o faamanuiaga uma.

TUSI FAITAU: Isaia 19: 4 – 10

FESOASOANI MO FAIAOGA:

Faatalofa ma ofo alofa atu i le tatou vasega i lenei taeao, o le aso Sa mulimuli fo'i lenei o le masina lona 7 o le tatou faiga malaga. Malo ia te outou le fanau le onosa'i ma le faamalolosi. Viia le Atua ona o le malosi ma le ola. O ia lava o le pogai o manuia e tele ua mafai ona tatou maua i lea aso ma lea aso.

O Israuelu o le nuu filifilia o le Atua. O le nuu ua molimau i le tele o le alofa ma le tamaoaiga o le Atua. A toe manatu i le i ai o Israuelu i Aikupito i le pologa ma le faigata, ae o lea lava na faia e le Atua le faaolataga tele ma laveaina i latou mai le lima sauva o Farao. Ua o'o fo'i i Kanana o le nuu na folafolaina, o taua ma isi malo na faia uma lava e le Atua. Peita'i ua le tutusa le agalelei atu o le Atua ma amioga o le nuu o Israuelu. O le nuu faamaliegate ma le fiafia i le ola agasala. O lea fo'i ua faamalosi ai le perofeta o Isaia ia Israuelu, ona ua saili fesoasoani i nuu ese ae ua faatuatuana'i le Atua.

O le ala lea o le folafola o le malaia o le'a oo ia Aikupito se i ta'u atu ia Israuelu le silisilise o le Atua. O le a o'o le malaia i Aikupito. E mamate vai ma matutu vaitafe, o mea toto ma atina'e e faamoemoe i vai o le a faamateina ma manumanu. E le toe i ai fo'i ni ia e maua mai ai aua o le mamate vaitafe ma le toe maua se suavai. O le mata'utia lea o le mativa o le a oo i ai Aikupito. O le mata'utia o le Atua lea ua faailoa atu ia Israuelu. O Ia lava le pogai o faamanuiaga uma lava. O le ola lelei ma le manuia, e faamoemoe lava i le Atua o ia e faasoa mai ma fo'ai mai mo lana fanau e iloa ona saili atu ia te ia. O le vai ola lena e le mateneia, e ola pea, e le matutu, o ona magavai fetafea'i e

manuia ai faato'aga ma mea toto. E manuia ai e fai faiva aua e tele le 'ia e maua ai. Peita'i o le'a mate le vai ma le toe manuia. O le a malaia Aikupito ma ave esea ona manuia se i ta'u atu ia Israuelu le pule aoao o le Atua. O le taui o le saili fesoaoani sese o Israuelu i isi malo ae o loo sisila le Atua. O le Atua na ia tauave mai Israuelu i le amataga, ma tapena faamanuiaga e tele mo Israuelu.

Mo tatou fo'i le fanau, ua na'o le Atua lava e tatau ona tatou saili fesoasoani iai. O le vai ola, o le ata faatusa o le Atua, o le faailoga o manuia e tele e maua mai ai, aua o le puna o faamanuiaga ma mea lelei uma lava.

GALUEGA FAATINO: Faasoa manatu.

Faailoa sou manatu, Aisea ua oo ai le malaia ia Ailupito? O Aikupito po o Israuelu o lo o le fiafia i ai le Atua?

PESE: 123 Pese ma Viiga

A'OA'OGA:

1. Ia saili i le Atua e manuia ai.
2. O le Atua o le pogai o faamanuiaga.
3. E faia e le Atua mea sili mo le tagata e saili ia te ia..

.....

MANATU TA'I ALA O AUKUSO:

PUAPUAGA, FAAMOEMOE

E i ai le fuaitau tamaiti e masani ai Samoa, "e tuaoi afa ma maninoa". O lona uiga po o le a lava le tigaina ma le mafatia i suiga louloua o le tau po o se afa fo'i, e mautinoa lava e mavae atu lena ae togo ane foliga matagofie ma lagi lelei o le aso e soso'o ai. E faatusa faapena le savaliga faale-faatuatua, e ui i fita

ma puapuaga, peita'i o tua atu o na faigata o loo taoto ai manuia o le tagata e tumau le faatuatua i le Atua.

ASO SA: **6 AUKUSO 2023**

MATAUPU: **APA VAI MA LE IE SOLOI**

SINI: Ia malamalama le vasega e faaeaina le tagata faamaoni i lana auaunaga.

TUSI FAITAU: Ioane 13: 4 – 5, 12 – 17

FESOASOANI MO FAIAOGA:

Soifua manuia ia te outou le fanau i lenei taeao fou, ae o le Aso Sa muamua fo'i o le masina lona valu o la tatou folaua i lenei tausaga, malo lava le faamalolosi. Viia le Atua i le malosi o lo o foai pea ia te outou le fanau. Talofa.

Faimai le fuaitau ua masani ai Samoa “ O le ala i le pule o le tautua” o le a lona uiga? E le mafai ona avea ma pule pe afai e le i tautua. ft.. o le matai Samoa, e le mafai ona matai pe afai e te le'i tautua i se aiga ma le nuu faapea fo'i le Eklesia. O le tautua, o le tiute fai o tagata uma. O le auaunaga e fusia i le alofa faamaoni ma le loto maualalo. E faatino fo'i le auaunaga ma le loto fiafia e aunoa ma se vaai i se taui.

O le mulumuluina o vae, o se auaunaga matua maualalo i aai o Palesitina. O se galuega e sili ona faatauvaa i tagata o Iutaia. O le tootuli i autafa o lona matai e solo pefu o vae ma faamama. E le o se galuega e mafaia e tagata uma aua o le luma. Peita'i na fai e Iesu. Le Iesu lea e taulagi e lona auso'o, o le Matai, o le A'oa'o, o le Alii ma le Faaola. Ae o lea ua faia le auaunaga e vaai maualalo ai le to'atele o tagata. Tatou te talitonu uma lava e le tatau ia Iesu lea galuega, peita'i ua faia lava Iesu o se

faata'ita'iga sili mo lana auso'o ma le galuega tala'i aemaise o le faatinoina o le auaunaga mo Ia ma lona finagalo, e amata mai lava i galuega e faatauvaa i le vaai faa-le-tagata. O le auaunaga e amata mea ai le ua fai ma ta'ita'i. Ia taulamua i galuega lelei uma lava ma ia fai ma faata'ita'iga sili o le avea ma auauna. O faata'ita'iga lelei, o galuega e faia i le loto mama, e maua ai le fiafia ma le manuia, aua e ofo atoa le ola ma le malosi e lavea'i le ua mafatia. E le o le saili viiga poo se fia lelei, ae o le auaunaga e faatino i le alofa faamaoni ina ia manuia isi uso a tagata. O le tu i luga o Iesu o le faailoga o le amana'ia ma le alofa, o le tuuiseina o ona ofu o le ata vaaia o le tuuise o lona mamalu ae afio ifo e fai ma auauna. O le ie soloi ma le apavai o le faailoga o le faamamaina. O le soifua auauna lea o Iesu ma le faata'ita'iga ua le gata o lona auso'o, ae ua a'oa'oina ai fo'i ma i tatou o e ua talitonu ma mulimuli e faia le finagalo o le Atua.

GALUEGA FAATINO: Faatinoga

Ia faata'ita'i e le vasega le galuega a Iesu na fai i lona auso'o, ma faasoa manatu i lagona o le nofo ma le ieie ma le apavai e solo vae o isi tagata.

PESE: 176 Pese ma Viiga

A'OA'OGA:

1. Ia fai ma faata'ita'iga lelei.
2. Ia maua le loto maualalo.
3. Auauna i matua.

.....

ASO SA: **13 AOKUSO 2023**

MATAUPU: **LEOLEO MAMOE LELEI**

SINI:

Ia malamalama le vasega o le Atua o le leoleo mamoe lelei.

TUSI FAITAU: Salamo 23**FESOASOANI MO FAIAOGA:**

Faamalo le folau, malo le onosa'i i le paia maualuga o le tatou vasega i tama ma teine. Ou te talitonu o loo manuia i tatou uma i le alofa tausi mai o lo tatou Matai sili o i le lagi. Viia le Atua ina ua ia ta'ita'i mai lo outou soifua e faaauau lo tatou valaaui i lenei taeao fou. Talofa.

O le tatou mataupu mo lenei aso ua faaulatalaina "Leoleo mamoe lelei" I le mataupu sa tatou faitauina o loo manino ma malamalama ai, o le leoleo mamoe o loo autu i ai le salamo o le Atua. Lea lava e ta'utino e le fai salamo e faapea, "o le Alii o lo'u leoleo mamoe lelei o Ia, e leai se mea ou te mativa ai". E mafai ona faamatalaina e ia upu le uiga o le mataupu atoa lenei. O le aumai e le fai Salamo o le ata o le leoleo mamoe e faamatala ai lo la va fesoota'i ma le Atua i aso uma o lona ola.

O le Salamo lenei e 23 ua masani ai la outou faafofoga, aua e taulotoina i lotu faaleaiga i afiafi ta'ititasi. O le Salamo fo'i e eseese ai manatu o le au atamamai o le Tusi Paia i lona mafua'ga. O isi talitonuga o le salamo e uiga i le taumafai o Saulo e saili se auala e fasiotiina ai Tavita, o isi talitonuga o le taimi na taumafai ai Apiseloma e fouvele ma faoa le malo mai lona tama. O le tasi talitonuga o le Salamo e faamanatu ai le aao laveai o le Atua ao iai Isaraelu i Aikupito. Peita'i o le isi talitonuga o loo faataatau lava le Salamo i faiva faaleoleo mamoe o Tavita i le lafu o lona Tama. O ona tiute ma ona faiva e le faigofie ae sa ia faia lava ma le faamaoni ma lona soifua faatuatua i le Atua. O lona faamaoni lea na afua ai ona totofi mai ai o ia e le Atua e fai ma tupu i lona nuu.

Tuu ia po o le a le mafuaaga na tusia ai le Salamo, ae fia faataua e le tatou mataupu le uiga o le Samalo ma se feau taua o loo

momoli mai mo i tatou. O le faaaogaina o le ata faaleoleo mamoe e faamatalaina ai le va fesoota'i o le Atua ma le tagata. O lo o aumai ai se ata o le galuega tele o loo faia e le Atua i aso uma ma taimi uma o lo tatou ola. O le faailoga o le Atua auai. O le faamatalaina o le to'oto'o, o lo o aumai ai se ata o le aao ta'ita'i o le Atua, ma lana puipuiga malu i lo tatou soifua ma le ola. E faamatalaina fo'i e le to'oto'o le pule aoao a le Atua i mea uma lava. O le faamanatu o le tatou mataupu mo i tatou uma, o le Alii o lo tatou leoleo mamoe lelei, e silisili i mea uma lava. Na te puipui ma lavea'i i tatou i mea uma, o ia fo'i e ta'ita'i i tatou i ala tatou te manuia ai.

O le aso Sa fo'i lenei tamaiti ua faapitoa mo tama. O le aso e faamanatu ai le sao taua o tama i totonu o le nuu ma le Ekalesia ae o aiga fo'i. O isi ia tiute a tama o loo faatino mo fanau, o le leoleo ma tausi ina ia malu puipuia le aiga, ia manuia ma saoloto i tatou le fanau i mea uma. E le mana'o e fiaaai pe olafalolo tatou le fanau. Ia tatou tatalo ma faafetai i le Atua ona o tama ma lo latou sao taua. Ia manuia tele le aso Sa o tamā.

GALUEGA FAATINO: Taaloga (Blind Fold)

Ia ta'itoalua ona nonoa lea o mata o le tasi ae ta'ita'i e le isi. E faamoemoe le ua noanoa mata i le ta'ita'iga a lona soatau. E faapena le savaliga a le tagata faatuatua e alu lava ma le mautinoa ma le faatuatua o lo o taita'i o ia e le Atua.

PESE: 175 Pese ma Viiga**A'OA'OGA:**

1. O le Atua o le leoleo mamoe lelei
2. E auai le Atua i mea uma.

.....

ASO SA:

20 AOKUSO 2022

MATAUPU:

TUMAU I LE ATUA

SINI:

Ia malamalama le vasega o le alu ese o le tagata mai le Atua, o le alu ese lava lena mai manuia o le Atua.

TUSI FAITAU:

1 Samuelu 17:41-47

FESOASOANI MO FAIAOGA:

O le manumalo o Tavita ia Koliata, ma le tulia o itu taua uma a Filisitia. E le se toa po o se maoae o se poto o le tamaititi leoleo mamoe o Peteleema. A o le finagalo fai toatasi o le Atua. Se i toe faatepa lava lana auauna o Saulo na ia totofi e fai ma taitai o lona nuu, i wavega e faia e le Atua i le tagata e faamaoni lona loto i lona Atua. Aua ua avea le faaeaina o Saulo ma ala ua faagalo ai lona Atua le pogai o lona mamalu ma le malosi.

Sa iloga le tula'i mai o Saulo i le nofoalii o Isaraelu, aemaise o lona faato'ilaloina lea o fili o Isaraelu, o le mafuaaga o lona mamalu ma le faaeaina aua sa faalagolago lona ola i lona Atua. O le ala foi lea sa le popole pe fefe ai pea oo mai lu'itau ma faigata o le ola. O le tupu sa to'a iai le ola le mautonu o lona nuu ma ona tagata.

Ae na alu ese loa mai lona Atua ma fai lona lava loto ma lona poto. Amata loa ona fememea'i, o mea sa le popole ai ua fai ma avega mamafa i lona ola. Lea la ua tula'i mai Filisitia, sa faigofie ia te ia i le taimi o faauouo ma lona Atua, ae lea ua popole ua le iloa le mea a fai, aua ua talia gofie le ola to'ilalo, ona ua leai se Atua.

O le tula'i mai la o Tavita e laga le to'ilalo o Isaraelu ma faato'ilalo le toa manumanu o Filisitia. O le amataga fo'i lea o le to'ilalo popo o Saulo ma le aveesea e le Atua o lona mamalu. O ana upu ia Tavita o loo i le fuaiupu e 33 o lo o manino ai, ua

matua galonimo ia Saulo o lo o ia le itu taua a le Atua. Ua vaai maualalo ia Tavita ae ua galo vavega na faia e le Atua i le tamaititi leoleo mamoe. O le leona ma le urosa na fasi e Tavita. O le ata lena o le gafatia e le tagata e faalagolago lona ola i le Atua ae le o sona malosi.

O le pogai lea o le lototeli o Tavita e alu e faafetaia'i le toa o Filisitia, aua sa faalagolago lona ola i le Atua, e faia fo'i e le Atua mea sili e molimau i ai tagata o e le talitonu i lona mana ma lona silisilise.

O lo o tatou i ai i se lalolagi vevesi ma le tele o faafitauli, o suiga malolosi o le tau ma ona aafiaga, o taua ma faama'i, o le tau o le soifuaga, o upu fai a malo ua o'o lava i nuu ma alalafaga faapea aiga aemaise le Ekalesia, aua tatou te popole ma fememea'i, ia tumau lo tatou faatuatua i le Atua. Ia tatou mautinoa le auai o le Atua i lo tatou ola i mea uma tatou te fai. Aua tatou te o ese ma le Atua ina nei faiaina i tatou i le lalolagi ma ona faafitauli. Ia taula lo tatou faatuatua i le Atua, aua o ia lava e tapena ma faia mea sili mo lana fanau e tumau ma faatuatua ia te ia.

GALUEGA FAATINO: Fa'atalanoaga

Faasoa manatu o le vasega e uiga i le valaauna o Saulo ma Tavita. O le a le mafua'aga o le tofia o Saulo e fai ma tupu, ae aisea fo'i ua valaauna ai Tavita?

PESE: 82 Pese ma Viiga

A'OA'OGA:

1. Ia usita'i ma faalogo i le Atua.
2. E manuia le tagata e faalagolago i le Atua.

.....

ASO SA: **27AOKUSO 2023**

MATAUPU: **O LE FAFINE ELENI**

SINI: Ia a'oa'oina le vasega ina ia malamalama o le faatuatua o le fafine Eleni na malolo ai le ma'i o si ana tama.

TUSI FAITAU: Mareko 7: 24-30

FESOASOANI MO FAIAOGA:

E tusa ma le molimau a Mareko e pei ona i ai le tatou mataupu i lenei Aso Sa, o lo o faa-ulutalaina e faapea, “O LE FAFINE ELENI” o le faatuatua uiga ese o le fafine o nuu ese. O le le ta'uai o le igoa o le tinā, o le ata vaaia o le le amanaia ma le ola taotaomia i le sosaiete. O le fafine lea e ta'uai, o le fafine Eleni sa fanau i Suria Foinie, o le oo atu o Iesu i laueelele o Turo ma Saitonu, e feso'otai lea ma le nuu o le fafine, o Suria Foinie. Na manatu Iesu e faalilolilo lona alu atu i Turo ma Saitonu, ia aua nei iloa o ia e tagata, ai ua fia maua e le Alii se malologa mai ana a'oa'oga ma ana galuega faamalolo. Peitai fai mai le tala a Mareko, e le i lilo i lea tina le maliu atu o Iesu. O le faailoga o le tina mataala, ua naunau moni lona loto ia Iesu. Ua leva ona ia faatali ia Iesu aua ua ia mautinoa ua na o Iesu e mafai ona faamalolo i lana tama teine ua ulufia e le temoni. Fai mai le molimau ua ia alu ane ma faapa'u i aao o Iesu ma faatoga atu ia te Ia.

Na silafia lelei e Iesu o le fafine lenei o le fafine o nuu ese, o le fafine Eleni, o le ala lea na ia tali atu ai e faapea. “Seia lua'i maoona le fanau, aua e le tatau na ave mea e ai a le fanau, ma lafo i uli. O le tasi lenei o lafoga a Iesu e te'i ai le faalogo ma ua

tuufesili ai nisi, aua ua foliga ua faailoga tagata Iesu, o upu e atagia ai le le amanaia o lea tina i le sosaiete. Peitai e le o lea le faamoemoe o Iesu, ua mautinoa lelei e Iesu o le vaai lea o lea e vaai ai tagata Iutaia i tagata o nuu ese, mai lea ta'u faatauvaaaina na mautinoa ai e Iesu le moni o le faatuatua o lea tina.

Fai mai le molimau a Mareko, ua tali mai le fafine, Le Alii e, moni a oe, a e 41a i lea o uli i lalo o le laoai e 41a ii latou i momoi mea a tama. O le molimau ma le ta'utinoga lea o le faatuatua o lenei fafine ese, o lana tali atu ia Iesu o lo o ia malamalama lelei, o le fanau lea e taua e Iesu, o lo o faasino ia Iutaia ao uli o loo faasino i nuu ese, sei mua'i faatino muamua lana galuega faaola ia Iutaia ona oo atu ai lea i nuu ese, peitai ua le taofia le saili fesoasoani, naunau ma le faatuatua o le tina ina ia ola si ana tama. Fetalai Iesu “Ina alu ia ona o lau upu lena, ua te'a le temoni sa i totonu o lau tama”.

E faapena fo'i lenei olaga le fanau, e tofotofoina lava i tatou i le tele o mea tatou te manana'o ai ma iu ai lava ina fusia i tatou i le faavaivai. Peita'i o lea ua a'oa'oina i tatou ia tauivi pea, aua le faavaivai ma ia tumau pea le faatuatua i le Atua. O isi fo'i o tofotofoga o lo o saili mai Iesu pe moni lo tatou saili atu ia te ia. Manuia outou le fanau.

GALUEGA FAATINO: TUSITUSIGA – Solo

Tusi sau solo 2 fuaiupu, 6 laina i le fuaiupu e 1. O le ulusolo “**O lo'u tina**”.

Ia mafai e le solo ona faamatala le galuega alofa ma le tausiga a lou tina i taimi ma aso uma o le ola, o taimi e malosi ai faapea taimi e feagai ai le ola ma puapuaga.

PESE: 5 Pese ma Viiga

A'OA'OGA:

1. Iesu o le foma'i sili.

2. E mafai mea uma i le faatuatua

.....

MANATU TAIALA O SETEMA: O LE TALA LELEI I LE ALOFA TUNOA O LE ATUA

O le Tala Lelei i le alofa tunoa o le Atua, o le tala lava na afua mai i le amataga o le foafoaga aoao. Na matua manino mai lava lea alofa tunoa, ina ua soloi esea e le Atua o mea uma ua i ai le ola i le lolo, ma ua agasala tagata uma, ma ia toe faia ai se amataga fou, e ala ia Noa ma lona aiga ma mea na faasaoina e le Atua mai le lolo. E foliga mai, faatoa atoatoa le Tala Lelei i le Feagaiga Fou ma ua liutino tagata le Atua e ala ia Iesu Keriso, ina ua maliu ma toetu mai le oti ma le tuugamau, ina ua mafai ona soloi esea agasala a tagata uma.

ASO SA: **3 SETEMA 2023**

MATAUPU: **O LE LUPE O LE ULUAI AVE FEAU
O LE TALA LELEI**

SINI: Ia malamalama le vasega, o le Tala Lelei, o le ola lea mo fanau a le Atua.

TUSI FAITAU: Kenese 8: 1 – 22

FESOASOANI MO FAIAOGA:

O le tatou mataupu i lenei taeao, e fia faamatalaina atu, ina ia outou malamalama, o le tasi o mafuaaga na ia tuuina atu ai le lupe na ia te ia, e le gata ia iloa ai po ua papa'u le vai, a o le fia iloa foi e Noa mai le Atua, pe o toe i ai se ola i le lalolagi. Ua to'a le vaa o Noa i le mauga o Ararata, ma ua saga mauui le vai, ua atoa aso e fasefulu. Ona oso ifo lea o le manatu o Noa, po o le mea ea o toe i ai se ola i fafo atu o le va'a? Ona tatala lea o le faamalama o le va'a na fai e Noa, ua ia tuu atu ai le

oreva. Fai mai, ua lele atu ia ma fefoifoiai, a ua le toe foi mai le va'a. O le oreva e ola i tino mamate o meaola ma tino tagata oti. Ona faanoanoa ai lea o Noa, ma ua tatalo i le Atua, ma fai atu, O le mea ea le Atua, o toe i ai ea se ola i fafo atu o le va'a? Ua uma aso e fitu, ona toe tatala lea o le faamalama o le va'a, ma ua ia tuu atu le lupe. Peitai, ua le maua e le lupe se mea e mapu ai ona vae, ona toe foi mai ai lea o ia, ia te ia i le va'a.

O le aso fitu lava lea na toe tuuina atu lea e Noa o le lupe ai le va'a. Ua toe foi mai ai le lupe ia te ia i le afiafi, faauta foi, o i lona gutu le lau olive mata. Ona iloa ai lea e Noa, o lo o maui atu pea le lolo. Ona olioli ai lea o ia, ma ua ia manatua ai, o le Atua o le pogai ma le mafuaaga o le ola. O le foafoaga i le amataga, na fai e Ia mai le leai o se mea, i le ofoofovogia o mea uma. O le faaumati o mea e tele e le lolo, sa toe faafouina e le Atua lana foafoaga, mai nai mea na faatotoe ma faasaoina mai le matautia o le lolo, sa i le vaa o Noa.

O le mea lea na tumu ai le loto o Noa i le fiafia. O le ulua'i gaioiga lava a Noa ina ua ulufafo ma le va'a, o le fausia o le fata faitaulaga ma osi le taulaga faafetai i le Atua, o se mea e tatau mo tagata ola uma, o le ola e ofoina le tapuagia i le Atua.

Le fanau, o le Aso Sa lenei o lo o tatou faamanatuina ai le taunu mai o le Tala Lelei i laufanua o Samoa, na aumai e Misionare. O Misionare, o lupe na faalele mai e le Atua ma lo tatou Alii Faaola o Iesu Keriso e momoli mai lau olive mata, o le Tala Lelei o le alofa tunoa o le Atua mo Samoa, ina ia tatou maua lona filemu ma le ola fou atali faavavau. Afai e te matamata i le Logo a le EFKS, o lo o i ai le ata o le lupe, va'a o motu, o le atu Samoa, ma le satauro o Keriso. O lo o taaofai le uiga o le Tala Lelei.

Na afio mai lava Iesu Keriso i le lalolagi, ma foa'i mai lona soifua paia e ala i lona maliu ma lona toetu ina ia tatou maua le ola fou ma maua atili ai lava. Ia manuia le Aso Sa o le Tala Lelei.

Uiga o Upu ma Fuaitau:

- i) maui - ua vaivai le vai.
- ii) mauiui - Ua faasolo ina papa'u le vai.
- iii) mauga Ararata- igoa o le mauga e i le atunu o Armenia faafesagai ma le malo o Take, ma Iran po o Peresia.
- iv) fefoifoiai - felelea'i e alu ma toe sau.

GALUEGA FAATINO:

O le ata lea o le Logo a le EFKS, o lo o i ai le manulele o le lupe, o le va'a, o motu o Savaii, Upolu, Manono ma Apolima. Faamatala mai po o le a le uiga o ia ata ua tuu i totonu o le Logo a le EFKS



PESE: Pese & Viiga 185 - Talai le tala moni

A'OA'OGA:

1. Ia fai ma ave feau o le Tala Lelei.
 2. O le Atua o le punavai o le ola.
 3. Toe faafou e le Atua, mea ua malepelepe.
-

ASO SA: **10 SETEMA 2023**

MATAUPU: LUITAU FAIGATA

SINI: Ia malamalama le vasega o luitau, o faigatā o o fetaiai ma le ola.

TUSI FAITAU: Mataio 16: 24 – 26

FESOASOANI MO FAIAOGA:

O le olaga o le Kerisiano, o se ola e fetaui pea ma luitau faigata. E faigata, auā ua masani tagata o le lalolagi, i mea faafafia o le ola nei, e faigata ai ona tumau i le faatinoina le ola Kerisiano, auā ua pulea e Keriso le loto ma le mafaufau.

O mea ia o lo o taua i le tatou tusi faitau, o le sini lea ma le manatu autu, o lo o avatu pea lava pea e Iesu i lona au so'o ana a'oa'oga uma, ae latou te le au lagona lava le mea moni, ma le taunuuga manuia o le tagata e ola ai.

E tolu lava ni laasaga, e tatau ona saunia se tagata e faatino, pe afai e fia ola i le olaga o le Kerisiano.

1. E tatau ona sasae ese, uma manatunatuga ma tuinanauga o le lalolagi o i le loto. Ia avanoa le loto ina ia nofo ai le lagona fuatiaifo lelei, e ala i le galuega a le Agaga Paia. O lou teena o ou lava tuinanauga o le ola nei, i taimi uma, o lona uiga ua e fai atu i le Atua, ioe, o lou ola ua e pule ai. O le ola o le Kerisiano, o le ola lava ua soifua ai Keriso.
2. E tatau ona e amo lou satauro. O le ola o le Kerisiano o le ola ositaulaga, e fetaiai pea ma luitau faigata. O lona uiga o lea mea, e tatau ona lafoa'i manaoga o le lalolagi, ae auauna ma le loto atoa ia Iesu Keriso.
3. E tatau ona e mulimuli i ala o Keriso, o le uiga o lea mea ia e faalogo ma usitai ia Iesu. O le Kerisiano, e savali i tulaga vae o Iesu, po o fea lava na te taitai i ai oe.

O le tagata ua ia lafoai ana mea uma, ma foliga mai, ua leiloa ana mea uma, ona o Iesu Keriso, e maua e ia le ola mai ia te Ia. O luitau faigata ia, na fetalai ai Iesu i lona au so'o ma ua fetalai mai ai ia i tatou, ina ia tatou ola ai i aso uma, auā tatou te maua mai iā te Ia le ola atali.

Ua fetalai mai foi Iesu, e lapataia i tatou, pe afai tatou te le faalogo ma usitai i lona a'oa'o mai. Aua, se a le aoga i le tagata pe afai na te maua le lalolagi uma, ae maumau ai lona ola? Se a foi se mea e avatu e le tagata e togiola ai lona ola?

O le aoga lea o le tatou mataupu i lenei Aso Sa ina ia a'oa'oina outou le fanau, ua na o Iesu tatou te maua ai le ola ma maua atili ai lava.


O lu'itau faigata ia na tauave e Iesu, na ia tauave lona satauro ua faaee uma i ai a tatou agasala, ua magalo ai o tatou leaga, ma lona Toetu mamalu mai le oti ma le tuugamau, ua ia aumai ai le ola fou atali, mo tagata uma na tauivi ma luitau faigata ma manumalo ai.

Uiga o Upu:

- i) faafiti - teena
- ii) togiola - faasao, totogi
- iii) maumau - fa'aalu le aoga, lafoa'i

GALUEGA FAATINO:

O le ata lea o Keriso ma lona satauro o lo o amo. Tusi ni au amioga agasala se lima, o lo o e faia pea, a ua uma ona faatautauina faatasi e Keriso i lona satauro.



PESE:

Pese ma Viiga 40 (A ou manatu ifo nei)

A'OA'OGA:

1. Lafoai le agasala
2. Ia ola ia Keriso
3. Suia i le ola fou.

.....

ASO SA:

17 SETEMA 2023

MATAUPU:

O LE TALA LELEIA AGELU

SINI:

Ia malamalamā le vasega o le a fanau e Sara se tama, e ui ina loomatua o ia.

TUSI FAITAU:

Kenese 18: 9 – 16

FESOASOANI MO FAIAOGA:

O le tusi faitau o le tatou mataupu i lenei Aso Sa, ua fesiligia ai e agelu Aperaamo, po o fea o i ai lana avā o Sara? E ui ina

silafia e agelu le mea o i ai Sara, ma o lo o lagona mai e ia a latou felafolafoaiga ma Aperaamo. Ua tali atu o lo o i falē lava. Ona fetalai tu'usa'o mai lea o le Atua, e ala i agelu e toatolu, ua faapea atu, "Ou te toe foi mai lava ia te oe i le la tausaga, faauta foi, e fanau mai lau ava o Sara o le tama tane. A folafola mai e le Atua ona manuia mo tagata, e moni lava ma faamaoni, ma e taunuu lava. O afioga a le Atua, e le foi fua. E foi lava ua faaolaina, ma manuia ona tagata. O lo o faalogologo mai Sara i lenei folafolaga, ona ia ataata lemu lea. Ua faapea ifo i lona loto, ma ona lagona faaletagata. Ua ou loomatua, e ia te au ea le fiafia, o lo'u alii foi ua toeaina ia?

Ona faafogaga mai lea o le Atua, ma ua silasila mai le ataata a Sara ma ana upu. Ona fetalai lea o Ia ia Aperaamo, Se a le mea ua ataata ai Sara, o lo o fapea, "E moni ea, a ou toe fanau o a'u o le loomatua? E i ai ea se mea e faigata i le Alii? O ona po ua tu'upoina, ou te toe foi mai ai ia te oe i le la tausaga, e maua ai e Sara le tama tane.

O le Atua o le punavai o le faamoemoe ola mo le tagata i le lumanai pe a oo ina vaai atu ua punitia ana taumafaiga mo se lumanai manuia. O mea e gata ai le malosi o le tagata, o le taimi lena o le Atua. O le mea lea e tatau ona o faatasi tagata uma ma le Atua i taimi uma.

O Aperaamo ma Sara o tagata lava, e masani ma le soifuaga o le Atua. O lo la fetaiai pea ma le Tala Lelei e momoli mai pea e agelu, na maua ai le faatuatua ma faalagolago ai i le Atua. O lea lava na taua ai Aperaamo o le tamā o le faatuatua. O Iesu Keriso, o le Tala Lelei lea i le alofa tunoa o le Atua. Na folafola mai lava e auga perofeta, ma na taunuu lava, ua fai mo tatou faamoemoe ola e ala i lona maliu ma lona toe soifua manumalo. Ia manuia le Aso Sa.

Uiga o Upu ma Fuaitau

- i) le tu a fafine - o le mafai ona fanaua se pepe
- ii) tu'upoina - taimi fuafuaina

iii) molimolia - faafeao

GALUEGA FAATINO:

Ia faamatala mai i au lava upu, lagona na ataata ai Sara. Ua lava ni laina se lima e faamatala mai ai.

PESE: 92 (Pese ma Viiga)

A'OA'OGA:

1. Aua le ola masalosalo
 2. O le Atua amiontonu
 3. O le Atua o faamanuiaga.
-

ASO SA: **24 SETEMA 2023**

MATAUPU: **O MEA MATAGOFIE**

SINI: Ia malamalamā le vasega, o mea matagofie, o fua ia o le Agaga Paia mo le ola.

TUSI FAITAU: Kalatia 5: 22 – 26

FESOASOANI MO FAIAOGA:

O le uiga lea o le Tala Lelei a Keriso, e folafola atu ma ia liliuina tagata, ia fai ma mea fiafia le ola i mea matagofie, ina ua ulufale le Agaga Paia i loto o tagata.

Fai mai Paulo i tagata o le Ekalesia i Kalatia, e lelei tulafono, auā ana leai le tulafono, e le iloa e tagata lo latou ola agasala. Peitai, e le mafai e le tulafono ona faasaoloto mai tatou mai le

agasala. Aua e faiaina pea i tuinanauga o le tino ma pologa ai lava i le agasala. O le manatu la o Paulo, o le faaolataga o le atoatoa lea o le alofa tunoa o le Atua. Ia Paulo lava ia, e leai ma se tagata e mafai ona faamalieina le finagalo o le Atua. Pau le mea e tatau mo tagata uma o le talia o le alofa o le Atua, e ala ia Iesu Keriso ua ofoina mai, e ala i le faatuatua maua'a, ma ia naunau i aso uma i le alofa mutimutivale o le Atua.

O le pulunaunau atu lea a le Tala Lelei a Keriso i tagata o le Ekalesia i Kalatia, ia latou lafoa'i galuega a le tino, o le fiafia i tuinanauga o le lalolagi e leai se filemu ma se sa'olotoga e maua ai. Ia outou talitonu ma maua'a lo outou faatuatua i le alofa tunoa ma le alofa mutimutivale o le Atua, ia outou fua mai fua o le Agaga, o le alofa, o le olioli, o le filemu, o le onosai, o le mataalofa, o le agalelei, o le faamaoni, o le agamalu, ma le amio mama. Fai mai le Tala Lelei, e leai se tulafono e faatonu ai ia mea, auā ua taitaiiina tagata uma e le Agaga Paia o Iesu Keriso, o Ia lava o le ola fou e na te liliuina tagata uma ia fou.

O Iesu Keriso, o le alofa tunoa ma le alofa mutimutivale lava le a o le Atua ua afio mai le lagi, ma faailoa mai i lona soifua, fua o le Agaga o le Atua, ina ia tatou ola ai ina ia finagalo malie mai ai le Atua ia i tatou.

Uiga o Upu ma Fuaitau:

- i) alofa - O le agalelei e le totogia, na te le faia foi se leaga.
- ii) olioli - fiafia loloto o le loto, mai le Atua ma ana faamanuiaga.
- iii) filemu - lagona sa'oloto.
- iv) onosai - faapalepale o le Atua.
- v) mataalofa & agalelei - faatinoga o le lelei i taimi uma.
- vi) faamaoni - faamoemoeina i le faia o mea tonu.
- vii) agamalu - loto maulalo.

GALUEGA FAATINO:

O le ata lena o le laau ma ona fua. Tusi mai ni fua o le Agaga o lo o e ola ai i luga o le laau, po o le faaioga mai fua o le Agaga o lo o i luga o le laau.



PESE:

115 (Pese ma Viiga)

A'OA'OGA:

1. Ia fua mai i le Agaga lau amio.
 2. Ia maua le filemu o le Atua.
 3. Ia e mataalofa.
-

MANATU TAIALA O OKETOPA: O FANAU O LE TAU MAI LE ATUA

Ia a'oa'oina fanau, o lo latou fananau mai i le lalolagi, o le tau i latou mai le Atua, mo latou matua. Ia a'oa'oina foi ia ava ma alolofa i o latou matua ia toe faamanatu i ai le tulafono e 5. Ia ava i tamā ma tinā e faalevaleva ai o latou aso i le lalolagi nei.

ASO SA: **22 OKETOPA 2023**

MATAUPU: **ATAATA UA FANAU MAI LE TAMA**

SINI: Ia malamalama le vasega, o le ataata ua fanau mai le tama, o le olioli loloto auā ua alofa mai le Atua i le aiga.

TUSI FAITAU: Kenese 21: 1 – 7

FESOASOANI MO FAIAOGA:

O le tusi faitau ua fai ma tatou mataupu o lenei Aso Sa, ua tatou vaaia ai foliga ataata o Sara ina ua ia fanau mai le tama o Isako. O le tama o le folafolaga a le Atua, e na te fa'aauauina ma faataunuina fetalaiga a le Alii, e pei ona ia fetalai ai ia Aperaamo. O le mea moni lava, o lo o aumai e lenei tala, e i ai faatasi le Atua ma matua ma tagata uma, i le faavaeina ma le atinaeina o aiga manuia. E pei ona uma ona ia faia o Atamu ma Eva ona Ia faamanuia lea i ai, ia fanafanau, ma ia uluola ia tumu ai le lalolagi uma.

O le aiga o Aperaamo ma Sara, sa feagai ma le le mautonu ona ua puaoa le faamoemoe mo le lumanaia manuia. Aua, ua matutua o laua olaga, ua mavae atu foi ia Sara le tu a fafine e mafai ai ona fanau mai ai se pepe. O le leai o se malamalama o Aperaamo ma Sara i le Atua, o Ia lava o le Foafoa o mea uma mai le leai o se mea i le tino mai i le matagofie mea uma, o lo o i ai le ola. Na le amanaiaina e le Atua lea vaivaiga faaletagata o Aperaamo ma Sara ona o le alofa lava ia ola manuia le fanau a tagata i le lalolagi.

O le fanau mai la e Sara o le tama o Isaako, o le folafolaga e pei ona fetalai mai ai le Atua, na suia ai le ataata le talitonu o Sara, i le ataata o le olioli loloto, ina ua vaai atu i le faamoemoe, ua pupula mai ona manuia.

Ua ataata Sara ina ua fanau mai le tama, ua aumai ia te ia le olioli moni, ma vivii atu ai i le Atua, i mea matagofie ua faia mo ia. O le feau o lo o avatu e le tatou mataupu i lenei Aso Sa, e folafola atu pea e le Tala Lelei, le alofa mutimutivale o le Atua e ala ia Iesu Keriso lona Alo pele e toatas, ina ia suia lo tatou ola tuinanau i mea o le lalolagi, ae tatou gaua'i ia te Ia. E fai lava o tatou loto. Ia manatua, o lo o faatasi mai le Atua i taimi uma, e faavae ma atiae o tatou olaga, ina o tatou maua ona manuia. Ia manuia le Aso Sa Paia.

Uiga o Upu:

- i) Isaako - ataata
- ii) fa'aataataina - faafiafiaina.

GALUEGA FAATINO:

Tau mai ni lagona se lima na oo ia Sara ina ua fanau le tama.

1. fa'aataataina
2. mautinoa le faamoemoe
3. ua tupu le faatuatua e mafaia e le Atua mea uma.
4. e le amanaiaina e le Atua lagona faaletagata.
5. e taunuu folafolaga a le Atua.

PESE: 180 (Pese ma Viiga)

A'OA'OGA:

1. Ia talitonu ma faatuatua i le Atua.
2. O le ola fou e mai le Atua.
3. Mai le Atua lo tatou faamoemoe.

.....

ASO SA:

29 OKETOPA 2023

MATAUPU:

O LE LOTO O LE TAMAITIITI

SINI:

Ia malamalama le vasega, o le loto o le tamaitiiti, o faatusa i ai tagata o le malo o le lagi.

TUSI FAITAU:

Mataio 18: 1 – 4

FESOASOANI MO FAIAOGA:

O le tatou mataupu i lenei taeao, o lo o aumai ai e le tusi faitau le taua tele i le finagalo o Iesu o tamaiti.

O le fesili a le auso'o ia Iesu, O ai ea e sili i le malo o le lagi? O le manatu o le auso'o, o latou ua i totonu o le malo o le lagi, a ua latou fia iloa mai, ia Iesu. O ai ea e sili? Ona valaau ai lea o Iesu i le tamaitiiti, ua faatu ia te ia i o latou luma. Ua fetalai Iesu i lona auso'o, e tali e tusa ma lo latou fia iloa o le tagata e sili i le malo o le lagi. E moni, ou te fai atu ia te outou a le liua outou ma avea e pei o tamaiti, tou te le sao lava i le malo o le lagi. O lenei o se faamaulalo o ia ia te ia e pei o le tamaitiiti nei, e sili lea i le malo o le lagi ua manino lelei le fetalaiga a Iesu i lona auso'o. Ua malamalama lelei foi le auso'o i le tali malamalama ua aumai. Ona iloa ai lea e i latou le sesē mamao o le mea o lo o latou faasaga i ai, ma le itu o lo o i ai le malo o le lagi.

O le fesili tele lava, o a ni mafuaaga mai le loto o le tamaitiiti, ia liua ai tagata uma, ona avea lea ma e sili i le malo o le lagi? E tolu ni itu taua o fai ma faailoga o tagata o le malo o le lagi.

1. O le loto mamā.
2. O le natura o le tamaitiiti, o le ola faalagolago i ona matua mo lona saogalemu ma le ola solo lelei i aso uma. Afai e i ai i tagata uma le ola faalagolago i le Atua, o le a

maua le malosi faafouina, le filemu moni e ola ai i aso uma.

3. O lo o i ai i le tamaitiiti le talitonu (trust) i ona matua e alolofa faamaoni ia te ia, e saunia mea uma mo lona saogalemu

O le loto maulalo o le tamaitiiti, o le alafua faataoto lea o le amio a le Kerisiano i le isi ona uso a tagata. O le ola faalagolago ma le faatuatuaina (trust) o le tamaitiiti o le alafua faataoto lea o le Kerisiano i le mafutaga ma le Atua le Tamā o tagata uma.

O le a'oa'oga lea a Iesu Keriso mo i tatou ina ia fai i tatou ma tagata nuu o le malo o le lagi. O le finagalo mama ma le maulalo o le Alii, na iu i le satauro ma maliu fasia ai, ae toe soifua manumalo mai, ina ia tumau pea le loto maulalo, le soifua faalagolago ma le faatuatuaina (trust) le Atua le Tamā, ina ia faaolaina i tatou ia te Ia.

Ia tou liua, ma avea e pei o tamaiti, ona tatou sao lea i le malo o le lagi. Ia manuia le Aso Sa.

Uiga o Upu ma Fuaitau:

- | | | | |
|------|----------------|---|--|
| i) | Malo o le lagi | - | o le malo faa-le-agaga o tagata o le Atua. |
| ii) | liua | - | liliuina, suia |
| iii) | avea | - | ia foliga tutusa |

GALUEGA FAATINO:

Ia fai mai ni faataitaiga o le loto maulalo, le ola faalagolago ma le faatuatuaina (trust) o le tamaitiiti.

Faataitaiga: E tiga lava ona sasa le tamaitiiti ae sau lava i lona tamā ma lona tinā.

PESÉ: Pese ma Viiga 380

A'OA'OGA:

1. Ia ola loto maulalo
2. Ia ola faalagolago i le Atua.
3. Ia tauivi ia avea oe ma le sili i le malo o le lagi.

.....

MANATU TAIALA O NOVEMA: OLA OSITAULAGA

Ia malamalama le fanau, o le ola ositaulaga, ua le na o mea e te ofoina atu i le galuega a le Atua, a o le ola e faatinoga ai mea lelei uma i lou olaga e pei ona finagalo ai le Atua tatou te faia.

ASO SA: *5 NOVEMA 2023*

MATAUPU: *AMIO LELEI UA PUAPUAGATIA*

SINI: Ia malamalama le vasega o le amio lelei, e luitauina lava e puapuaga.

TUSI FAITAU: Kenese 39: 1 – 20

FESOASOANI MO FAIAOGA:

O le tala lenei ia Iosefa le tama talavou, ua maua'a i lona loto le faatinoga o le lelei, ae inoino i mea leaga. E afua ona naunau le loto i le faatino o le lelei, ona o le siosiomaga na ola ai i lona aiga. O Iosefa na mafanafana tele le mafutaga ma lona tamā o Iakopo, ua a'oa'o ma faatonu i ala o le amiotonu.

E le faapea ona uso o tagata ulavavale. Na amata ona puapuagaina Iosefa i totonu lava o lona aiga, auā ua latou inosia o ia ona o le faatinoga o le lelei. Na iu ai ina latou faatauina atu o ia i tagata Isamaeli, ma o atu ai i Aikupito ma latou toe faatau atu Iosefa ia Potifara le auauna sili a Farao, o le pule i le au

faafeao. O le mea lea na mafua ai ona i ai Iosefa i totonu o le aiga o Potifara, e pei o le tusi faitau o le mataupu o lenei Aso Sa. Ua alu ese mai Iosefa mai i lona aiga ma lona tamā. Ua leai sona faasinomaga, ua ola i lalo o le pule a le tagata taualoa ma le mau tulaga i Aikupito, ae le mafai ona tuulafoa'iina e le Atua, le tagata e naunau i le faatinoga o le lelei.

Ua auauna Iosefa ia Potifara, ma o ia o se tagata manuia, i totonu o le aiga o le Aikupito. Ua iloa ai, o lo o i ai le Atua faatasi ma Iosefa, ma alofagia ai o ia e le Aikupito. Ua avatu le pule i mea uma a lona aiga i lana vaaiga, e oo lava i le fale ma le fanua ua manuia ona o le Alii. Ua i lima o Iosefa ana mea uma. Peitai, e le mafai lava ona ma nafonofo le puna o le leaga, o le tiapolo, e vaai atu loa i le lelei ua ia pulea se tagata, osofai loa lava lea tagata, ina ia toilalo le lelei i lona leaga.

Ua tumu Iosefa i manuia i totonu o lona aiga fou i Aikupito, ma ua pupula mai ai ma lona lalelei. Ua faaosooosoina ai o ia e le faletua o Potifara la te momoe. O se gaioiga i le manatu o Iosefa, o se matua le alofa, ma lona le fa'aaloalogia o lona matai. O lona matai ua tuu atoa mai ia te ia lona faatuatuaga, ina ia malu puipuia le gasologa lelei o lona aiga, ma atili ai ona tele pea lona manuia. A o le mea sili ona leaga, o le lepetia lea o lona va lelei ma lona Atua Soifua. Le Atua ua ogatotonu i lona loto ma le agaga, e atili ai ona ia naunau pea e faia le lelei, ae le o le leaga, ina ia le oo i ai i le faatinoga o le agasala.

Ua tauanau pea ma tauanau pea lenei fafine i aso uma, ae tumau pea le teena o lona manao e Iosefa. Na ia fa'aaoga ai loa le pule, o ia o le faletua o Potifara le pule o le aiga, ma ia faatonu malosi atu ia Iosefa, Ta te momoe." Na ia tago atu loa i lona ofu ma toso faamalosi. Ua lagona e Iosefa ua tauau ina malo le tuinanau leaga o le fafine, ma faamamulu atu lea o lona ofu i le fafine, a ua sola i fafo. O le ofu lava lea na fai ma auupega a le faletua o Potifara, e faamaonia ai ana tuuaiga sesē, i le gaioiga na te lei faia.

Ua talitonuina foi Potifara i upu, ua tuuaifuaina ai Iosefa. Ua toatamai ma tago atu ua ave le auauna na manuia ai lona aiga,

ma tuu i le falepuipu, e aunoa se suesueina o Iosefa, pe faamaonia nei molimau sese. Ua alu filemu o ia i le falepuipu.

E le mafai lava ona tuu mamaina e le tiapolo o le puna o mea leaga, le tagata na te faia le faamaoni, le alofa ma le amiontonu a le Atua. E galue pea le tiapolo e fa'aaoga ai isi tagata e faaoo le leaga, i le tagata ua masani ma le faia o le lelei i le ola i aso uma.

Peitai, e le tuulafoa'iina e le Atua ona tagata ua tumau i le fiafia i le faatinoga o le lelei. O le iuga manuia o Iosefa mai le Atua, ua avea ma tagata sili o Aikupito.

Ua tatou molimau foi i le soifua o Iesu Keriso na puapuagaina, na oo lava i le satauro ma maliu ai. A o le Atua ua na toe faatuina mai le oti ma le tuugamau, ina ua matua toilalo lava le tiapolo o le puna vai o le leaga, ae faaolaina i tatou uma, e maua'a ma tumau i le faatinoga o le lelei. Ia manuia le Aso Sa.

Uiga o Upu:

- | | | |
|--------------|---|---|
| i) faafeao | - | leoleo ma fa'aaloalogia. |
| ii) Isamaeli | - | o tagata e tupuga mai ia Isamaeli
le tama a Akara le atalii o
Aperaamo. |

GALUEGA FAATINO:

Ua tatou iloa o le Atua, o le puna o le lelei, auā e lelei le Atua i taimi uma. Ua tatou iloa foi o le puna o le leaga o le tiapolo po o Satani.

O le a sou manatu, o Satani o se tagata e fai sona tino, pe na o se auala e faamatalaina ai le paoa (power) o le tiapolo? Tusi mai mafuaaga o lau tali?

PESE: Pese ma Viiga 122

A'OA'OGA:

1. Ia tumau i le amio lelei.
 2. Ia ola Iesu i lou loto.
 3. Tuanai puapuaga, ae oo mai manuia.
-

ASO SA: **12 NOVEMA 2023**

MATAUPU: **TAULEALEA TALAVOU I KETESEMANE**

SINI: Ia malamalamā le vasega i le taulealea talavou i Ketesemane ina ia iloa lona igoa ma le pogai na taumulimuli ai i le taimi na pue ai Iesu e tagata tau ma auauna a le au ositaulaga.

TUSI FAITAU: Mareko 14: 43 – 52

FESOASOANI MO FAIAOGA:

O le vaega o le tusi faitau ua fai ma tatou mataupu i lenei Aso Sa, o lo o aofia ma le fuaiupu e 51, ma le 52, o lo o taua ai le taule'ale'a talavou i Ketesemane na mulimuli ia Iesu ina ua puea o Ia, e tagata tau o fitafita Roma, ma auauna a le au ositaulaga sili. O le faamatalaga e uiga i le taule'ale'a lenei, ua na o le Evagelia lava a Mareko, o lo o taua ai. E le o ia o se so'o o Iesu, po o se auauna foi o le fale na faatino ai le taumafataga mulimuli a Iesu ma ona so'o. A o se taule'ale'a e mau i le fale e latalata i le togalaau olive i Ketesemane. Ua fai mai nisi o le tamaitiiti lenei o le fale o lona tinā, lea na fai ai le taumafataga mulimuli. Ua oso lona fefe ma le atuatuvalē i luga o lona moega, ina ua oo mai i lana faalogo le pisapisao ma le alaga leo

tetele, a o latou toso faatata le Alii o Iesu. Ua avea ai le nofoaga filemu o Ketesemane, ua fai ma fanua o le fia faaoo o le otu ma le fia faaumatia o galuega alofa a Keriso. Ua mafua ai ona atuatuvale lona loto i luga o lona moega, ma manatu ai ia sei molimau i lenei pisapisao.

Ua fia fai lenei taule’ale’ a ma tagata matamata a o i ai Iesu i le amataga ona puapuaga. Ua na ona tulai lava i luga tago i lona ie afu lino ua pulupulu, ma faanatinati atu loa i le mea o sau ai le vavao o leo o tagata, aunoa ma sona iloa ua lamatia ai ma lona ola. Ua taunuu atu, ua iloa ai ua leai ma se so’o o Iesu o ia vaai atu i ai, auā ua sosola mo lo latou saogalemu. Ua mulimuli mamao atu pea lenei taule’ale’ a talavou, a ua faateia ina ua puea faafuasei o ia e fitafita tau, o lea na ia faamamulu ai lona ie lino na pulupulu ai, ma maua ai ma lona avanoa e sola ‘ese ai, ma alu ai ma le saoasaoa tele. Ua toe taoto i lona moega ua atili ai ona gatete i le fefe.

O le faailoga lea, o le matautia tele o le motu o tagata, ua tutu faatasi, ia faaumatia Iesu. O le mafuaaga foi lea o le sosola faasulusulu o so’o o Iesu, mo lo latou saogalemu, aemaisse ai le faafitia ai e Peteru o lona Alii, ina ua molimau atu nisi o le motu o tagata o ia o lona so’o.

Peitai, o le mafuaaga moni lava na maua ai le avanoa o so’o e sosola ai, ma lenei taulealea talavou, ina ia taunuu fetalaiga a Iesu, Ioane 18: 9. O i latou na e foai mai ia te au, e lei fano so latou e toatasi. E oo ia i latou ua mulimuli ia Iesu ona o le fia malamalama, ae le o i ai le faatuatua.

A o le’i faaiuina le tatou mataupu, e faailoa atu, o le igoa o lenei taule’ale’ a talavou o Ioane Mareko o ia lea o le tusitala o le Evagelia a Mareko. Na amata mai lava i le itupo, na faalataina ai Iesu, na aafia lona olaga i le soifua o Iesu ma naunau ai lava, e fai o ia ma lupe faalele e tala’i le Tala Lelei a Keriso so’o ai le lalolagi atoa. O lea lava ua oo mai i o tatou taimi, o lo o folafola mai pea e lenei tama talavou le tala i le alofa tunoa o le Atua, ua fa’alia tino mai ia Iesu Keriso lo tatou Faaola. Na maliu

faamaturo o ia, a o tau faauma le tusiga o lana Tala Lelei ia Iesu Keriso. Ia manuia le Aso Sa.

Uiga o Upu:

- | | | | |
|------|-------------|---|--|
| i) | uatogi | - | o le auupega e fai i le laau |
| ii) | taofimauina | - | ia matua malu puipuia i le toe mafai ona matala. |
| iii) | faailoga | - | o le mea ua iloa ai le mea moni. |

GALUEGA FAATINO:

Fai mai le tatou tusi faitau Mareko 14: 50 – 52. Ona tuua ai lea o Ia, e i latou uma, ua sosola a ua mulimuli pea le tasi taule’ale’ a, ua pulupulu lona tino i le ie lino, ua latou pu’e ia te ia, a ua tuua e ia le lino, ua sola ia te i latou.

Sei tusi mai lava sina parakalafa e tasi, e faailoa mai ai ou lagona, o se mea alaga tatau le sosola a le au so’o, ae tuua ai na o Iesu. O lea foi ua mulimuli pea le taule’ale’ a talavou ae na iu foi i le sola au sulusulu mo lona ola. Faamatala mai foi mafuaaga o ou lagona.

PESE: Pese ma Viiga 126

A’OA’OGA:

1. Ia a’oa’oina mai isi tagata.
2. E tauave ma malu puipuia e Iesu lo tatou ola.
3. Ia ave le ola mo Iesu.

.....

ASO SA: **19 NOVEMA 2023**

MATAUPU: **IA FOI I LE ATUA**

SINI:

Ia malamalama le vasega, e manuia le tagata e foi i le Atua.

TUSI FAITAU:

Malaki 3: 7 – 12

FESOASOANI MO FAIAOGA:

O le tatou tusi faitau Malaki 3: 7 – 12, o le feau a le Atua i le Perofeta o Malaki, ia lapataia le au ositaulaga o Isaraelu, e tusa ai ma lo latou faatinoina o le tapuaiga faitaulaga o Isaraelu. Peitai, ua ave le feau a le perofeta, ua ta aofai ai tagata uma, auā ua toetoe lava tagata uma ua aafia i lenei agasala. O le agasala a Isaraelu, ua latou matuā lafoa'i le tulafono o le sefulua'i, e pei ona faia e Iakopo, ina ua toe foi mai i lona fa'aaunuua ai i Patanarama (Kenese 28: 20 – 22). O lea foi na lafoa'i ai e le au sa Levi la latou galuega i le malumalu, ae saili se mea e ola ai, auā ua leai se sefulua'i mai tagata lautele o Isaraelu. O lea ua toe faamalosi e Neemia le totogiina o le sefulua'i, ina i ai ni mea i le fale o le Atua (Neemia 13: 0 – 13)

Ua fetalai foi le Atua, ua ia silafia le aafiaga o atinae a tagata i mala faanatura, ae le avea lea ma ala o le lē faia o le sefulua'i, auā o lo o maua pea e tagata lo latou tamaoaiga. Auā o le faafitauli, ua le fia faia e tagata le sefulua'i, o le faailoga lea ua lafoa'i e tagata le Atua, ae fai o latou lava loto. E pei ona fai mai le fuaiupu e fitu; Talu mai aso o outou tamā, ua outou tetea ese ai i au tulafono, ma outou le tausisia i ai. Foi mai ia te a'u, ona o ou foi atu lea ia te outou.

Ua latou fesiligia foi le Atua, pe latou te foi atu ia te ia ma ni a? Pe tou te faoa ea mea a le Atua? Ua manino le fetalaiga a le Atua i le perofeta o Malaki, e faailoa ia Isaraelu, ua latou faoa mea e sefulua'i a latou mea. O le poloaiga ma le tulafono a le Atua mo le ola fai taulaga o tagata i le tapuaiga ia te Ia.

O le natura lava lea o le Atua e tatau ona tatou iloa. E le faapea ua afio ese le mamalu ma le Paia o le Atua mai i ona tagata, a o le uiga lava lea o lona alofa tunoa. E muamua ona lapataia i le

leaga e oo i ai, a o le taimi lava lea e tasi e folafola mai ai ma manuia e maua, pe a faalogo ma usitai, ia foi mai i le Atua. Ina aumai ia mea a le Atua, ua uma ona ia faatonu mai ia latou faia, ina ia i ai mea i lona fale tapuai.

Afai tou te foi mai ia te au, ona foi mai lea ia te outou. Afai foi, tou te fia tofotofo mai i lana amiontonu, ia foi mai loa, pe ou te le toina pupuni o le lagi mo outou, ma sasa'a atu le manuia mo outou, ina ia seia silisili ona tele.

Ioe, le fanau i lenei taeao, o le mea lava lea, o lo o naunau mai ai le finagalo o le Atua mo i tatou uma, ina ia tatou foi atu ia te ia, ona foi mai lea o ia ia i tatou ma sasaa mai ona manuia ina ia matua tele lava, e malie ai o tatou loto i mea lelei uma. Ia manuia lenei Aso Sa Paia

Uiga o Upu:

- i) sefulua'i - o le lona sefulu o le faitau aofai o mea ua maua, e faitaulaga ai mo le Atua
- ii) faoa - ave faamalosi
- iii) tofotofo - saili pe mafai, pe faamaoni tatalaina mai.
- iv) toina -

GALUEGA FAATINO:

E tutusa le sefulua'i ma le taulaga?

Afai e tutusa, faamatala mai le mafuaaga e tutusa ai.

Afai e lē tutusa, faamatala mai le mafuaaga e le tutusa ai.

PESE: Pese ma Viiga 158**A'OA'OGA:**

1. Foi i le Atua e maua ai manuia.
2. Ia ola faitaulaga i le Atua.

3. Ave mea a le Atua, e pei ona faatonu mai.

.....

ASO SA: **26 NOVEMA 2023**

MATAUPU: **FA'AAOGA TATAU LE OLA
TALAVOU.**

SINI: Ia malamalama le vasega, o le ola talavou, o le taimi o i ai le malosi e fa'aaoga tatau ai.

TUSI FAITAU: Failauga 12: 1 – 8

FESOASOANI MO FAIAOGA:

Ona pau lea o le mataupu o le tusi a Failauga o lo o taua ai le suafa o le Atua. O upu lava o lo o faamamafa ma taua pea e le Failauga, o le faatauvaa, ma le ai a le matagi. O sailiiliga foi ma le poto masani a le Failauga i mea o le olaga, o lana faaiuga lea, o mea uma ua faia i lalo o le la e matua faatauvaa lava ma le ai a le matagi, auā e oti le tagata ma foi i le eleele na faia ai o ia, a o le agaga e toe foi i le mea na aumai ai, o mea uma foi e toe foi lava i le eleele.

Peitai, o tua atu o nei manatunatuga o le Failauga, o lo o taoto mai ai lana mataupu silisili e faapea: E le oo loa le vaai a le tagata i le lagi i le Atua Soifua, o le mea lea ua faapea ifo ai lagona, o mea uma e faatauvaa ia ma le ai a le matagi.

O le ala lea o le aumai o le faamanatu a le Failauga i le mataupu lenei e sefululua, ia tatou manatua le Atua i lo tatou ola talavou. Auā foi o le ola talavou o le tagata o le tauga osooso lea o le malosi, ma punapuna a manu fou lona ola, e faigofie ona galo le Atua, ae ola loa i le matagofie o le lalolagi. Fai mai le Failauga i le tatou mataupu i lenei Aso Sa, o tagata ola uma e le gata e

filifiligā mo le ola olioli ma le fiafia, ae sili ona taupati ma taulai le vaai i le Atua.

Auā la, a oo mai le soifua matua, ua latalata mai foi le tuugamau, ma ua oo mai aso leaga, ma faapea ifo ua leai sou fiafia. O le faapouliuligia o le la, o le masina ma fetu, o le faailoga lea ua puaoa le vaai i le tino a o le mou atu foi lea o le olioli ma le fiafia. O le lē toe foi mai o ao o uaga, o le faailoga manino lea ua sosolo malie mai le soifua matua, ma aumai le lē mautonu ma le fememea'i. O le tele lava o faatusa o lo o tautala i ai le Failauga e faatusa ia ma faailoga o aafiga o le tino, o vae ua vaivai, o mata ua puaoa, o taliga ua lagonoa ua le ma moe, ua leai se malosi e toe fesootai ai ma le lalolagi fafo atu o ia.

Ae oo foi i taimi o le oti, o lo o aumai i faamatalaga faatusa ma o lo o vaevaeina i vaega e lua.

1. O le ipu auro o lo o mau i le filifili siliva, a oo ina aveese le filifili, ona pa'ū ai lea ma ta'e o lo o faatatau i le aoga o le ola, a oo ina oti ua ta'e le ipu auro, e le mafai ona toe tuu faatasia, faapei o le ola e le toe foi mai.

2. O le pakete po o le sia (jar) e faamau i le maea ma tu'utu'u ifo i lalo o le vaieli, i le mea taavili ma asu ae ai le vai. E i ai le taimi e gausia ai le mea taavili e ave a'e ina ai le vai. O le faatusa lea o le ola ua mavae atu ma le lalolagi. O le taunuuga mulimuli o le toe foi lea o le eleele i le eleele.

Fai mai le Failauga, o le mutaaga lea o le malaga a le tagata i le lalolagi, ua leai se isi faamoemoe, auā ua toe foi le tino o le tagata i le eleele e pei ona i ai o ia i le amataga o le foafoaga. A o le agaga, ua toe foi atu i le Atua, o le na foa'iina mai.

Peitai, o manatunatuga ma mafaufauga o le Failauga, na liliuina e Iesu Keriso ma lana Tala Lelei, le faamoemoe ola o tagata uma i le ola atali, ma le faavavau i lona lava soifua sasa'a mai e ala i lona maliu ma lona toetu mamalu mai le oti ma le

tuugamau. Ae tumau pea le taua o le feau a le Failauga. Ia manua le Aso Sa.

Uiga o Upu ma Fuaitau:

- | | | | |
|-------|--------------------------------------|---|---|
| i) | ua le foi mai ao
pe a mavae le ua | - | o le ola faanoanoa |
| ii) | leoleo i le fale | - | tausi le saogalemu o le fale |
| iii) | e ua olo | - | faatatau i nifo o le tagata |
| iv) | e vaai i faamalama | - | faatatau i mata |
| v) | faitotoa i le ala | - | ua tau le mafai ona
fesootai atu isi tagata e pei
ona masani ai |
| vi) | itiiti le leo o le olo | - | faatatau i le soifua matua
ua le mafai ona faatino
feau masani. |
| vii) | tausani o manu | - | o le moe filemu, ua fagua e
leo o manu felelei o le
taeao. |
| viii) | teine fai pesega | - | o teine pepese, ua mou atu
le malie |
| ix) | fefefe i mea maualuluga- | - | ua leai se malosi e mafai
ona fealuai |
| x) | fuga le sekati | - | o le faatusa i le ulu ua
enaena ma ulusinasina. |

O isi upu o lo o faamatalaina o latou uiga i le tala.

GALUEGA FAATINO:

Fai mai le Failauga i le fuaiupu e valu, E matua faatauvaa e faatauvaa mea uma.

E te ioe i le manatu o le Failauga, e matua faatauvaa, faatauvaa mea uma.

Afai e te ioe, tusi mai mafuaaga e lagolago ai le manatu o le Failauga. Afai e te le ioe, tusi mai mafuaaga o lou tete'e.

PESE: Pese ma Viiga 157

A'OA'OGA:

1. Ia taula'i lau vaai i le Atua.
 2. Ia fa'aaoga tatau lou malosi.
 3. Ia e saili le fiafia ma le olioli moni.
-

MANATU TAIALA O TESEMA:

O LE ATUA UA LIUTINO TAGATA E ALA I LE PEPE O LE KERISIMASI

Ia iloa ma malamalama le fanau, o le vaitau lenei e ta'ua o le Kerisimasi. O le faamanatuina o le aso na soifua ai Iesu Keriso i le lalolagi. Ia malamalama foi le fanau, o le fanau mai o le Pepe o le Kerisimasi o le Atua lava lea ua liutino tagata ma afio mai i le lalolagi.

ASO SA: 3 TESEMA 2023

MATAUPU: *O LE A TINO MAI I LE MALO O LE ATUA*

SINI: Ia malamalama le vasega, o le afio mai o le Atua, o le oo mai lava lea o lona Malo.

TUSI FAITAU: Isaia 9: 1 – 7

FESOASOANI MO FAIAOGA:

O le natura lava lea o le Atua. E fai pea le naunau o loto o tagata i le tuinanauga o le lalolagi, seja o latou oo i puapuaga, ona latou alalaga ai lea mo se faaolataga mai le Atua. E pei ona fai mai le Salamo 74: 1 Se a le mea ua e lafoa'iina mai ai i matou e faavavau? Se a foi le mea e pusa mai ai lou toasa i le lafu mamoe o lo o e fagaina? O le nuu ua pulea e le pouliuli o le agasala. A o le uiga lea o le alofa tunoa o le Atua. E na te le tuufauina ona tagata e pulea e le agasala. E na te aoa'i, sasa ma faatonu, e pei o le tamā i lona atalii. A mavae ese puapuaga ona oo mai lea o lana faamanuia i luga i ona tagata.

E pei ona i ai la tatou mataupu i lenei taeao. Ua finagalo malie le Atua, e faailoa mai ia Isaraelu ana fuafuaga o lona alofa tunoa, e faaumatia ai le fili numera tasi o tagata i le lalolagi o le agasala. Ua vavalo mai ai le Perofeta o Isaia, e faapea, Ae le pouliuli pea i le nuu ua puapuagatia, o le nuu sa savaval i le pouliuli, ua latou iloa le malamalama tele, o e sa nonofo i le nuu o le ata o le otu, ua pupula mai ia te i latou le malamalma. O se faamafanfanaga tele lea ma le malosi o le ola fou, e maua ina ua mavae atu le mafatia i le ola i le pouliuli. E pei foi ona tulaga lelei ai mea uma o le foafoaga, ina muai faia le malamalama.

A o le malamalama foi lea e na te aumaia le olioli ma le fiafia o le Atua i totonu o loto ma agaga o tagata. E faatoateleina ai i latou e fiafia ma olioli i lea malamalama o le Atua, e pei ona fai mai le Salamo 96: 11 – Ia fiafia le lagi, ia olioli le lalolagi, ia taalili mai le sami ma mea uma ua tumu ai, ia fiafia le laueelele ma mea uma o i ai.

E le gata i lea, a o le malamalama e na te gausia le amo o lana avega, o le pologa lea i le agasala. E gausia foi le tootoo o le sauia mai, o le tuinanau leaga o le agasala. E manumalo i mea uma o le lalolagi e faasaga tau i lea lava malamalama o le Atua. O lo o faatatau le malamalama lenei o le Atua, i le Mesia o le a afio mai, o le Atua lava lea e afio mai e faaola ma faasaoloto mai tagata mai le pouliuli o le lalolagi. E pei ona taua i le

fuaiupu e ono – Auā ua fanau mo i tatou le tama, ua foa'iina mai mo i tatou le atalii, e i lona ua le malo, e igoa foi o le Silisili Ese, o le Faipule, o le Atua malosi, o le Tamā o le Faavavau o le Alii o le Filemu.

O le malamalama lena o le Atua, o le a tino mai ai lona malo, e ala i lona liutino tagata. O le Alo o le Atua, o Ia mai le vavau e oo atu lava i le faavavau, a o lenei ua faamaulaloina o Ia e fai ma tagata ina ia faaolaina i tatou i lona malamalama. Ua oo i o tatou taimi, o lo o pupula mai pea le malamalama o le alofa tunoa o le Atua e ala ia Iesu Keriso ma lana Tala Lelei ina ia tatou maua lona olioli ma tatou maua atili ai lava.

O le malo o le Atua na folafola mai e le Perofeta o Isaia, ua tatou molimauina lea lava malo i o tatou taimi e ala i le Tala Lelei. Ia manua le Aso Sa.

Uiga o Upu ma Fuaitau:

- | | | | |
|------|---------------------------|---|---|
| i) | gauia le amo o lana avega | - | aveese le pologa o le agasala |
| ii) | o le tootoo o le na sauia | - | o le pule sauia a le agasala |
| iii) | tufatufa vete | - | o le oloa na aumai i le itu taua ua toilalo |
| iv) | taalili o le taua | - | o leo o le fetauaiga |
| v) | liloia | - | so'o atoa le ofu i le toto |

GALUEGA FAATINO:

Tusi mai faalupega e lima o lo o faalupe ai le atalii o le a fanau mai, e pei ona i ai le Tusi Faitau.

PESE: O oe le tupu moni

A'OA'OGA:

1. Ola i le malamalama o le Atua.

2. O Iesu o le Malo lava lea o le Atua.
 3. O le Mesia o Iesu Keriso lava lea.
-

ASO SA: **10 TESEMA 2023**

MATAUPU: **UA LIUTINO TAGATA LE ATUA**

SINI: Ia malamalama le vasega, o le fanau mai o Iesu i le lalolagi, o le Atua lava lenā ua liutino tagata.

TUSI FAITAU: Ioane 1: 1 – 5

FESOASOANI MO FAIAOGA:

Na faavaeina le Eklesia a Keriso i le aso Penetekoso, ina ua afio ifo le Agaga Paia i luga o le au so'o e toasefulu lua o Iesu, ina ia loto tetele e talai le Tala Lelei ina ia fai nuu uma lava ma so'o.

O le uluai Eklesia na mafuli lava i tagata Iutaia, ma o le folafolaina o le Tala Lelei ia Iesu Keriso, o lo o folafola atu lava i tu ma aganuu ma agaifanua a Iutaia, e pei o faaupuga o Iesu o le Mesia, o le Alo o Tavita. O le mea e leai se iloa ma e fou foi i le faalogo a tagata o nuu ese, aemaise ai lava le gagana Eleni, o lo o faapea ona fesootai ai tagata uma o le lalolagi i ia ona aso. E oo mai i le 60 AD talu ona maliu Iesu, ua lata i le selau ma ona tupu afe tagata o nuu ese ua i totonu o le Eklesia, a ua tauau ina tuu itiitia tagata Iutaia. A o le faafitauli lava lea o le faigata ona malamalama e tagata o nuu ese aemaise lava i tagata Eleni, i le Iesu lea o le Mesia na valoia, o le Alo o Tavita, o le Alo o le Atua, o le Atua ua liutino tagata, ua afio mai i le lalolagi.

Na matua manatunatu loloto ai le aposetolo o Ioane i se auala e talia gofie ai e tagata Eleni, le mafaufauga lea o le au Iutaia, o Iesu Keriso o le Atua, ua liutino tagata. Ua fa'aalia mai lava e le Agaga Paia ia Ioane le malamalama e fofo ai le faafitauli, e pei ona i ai le tatou mataupu i lenei Aso Sa.

O le mafaufauga o Ioane mai le Agaga Paia, o le Upu i le gagana Eperu e tutusa ma le Upu Logos i le gagana Eleni. A o le gagana Eleni o le lokou e lua ona uiga, o le upu, ma le mafaufau e faatino ai mea lelei. E masani tele le au Iutaia o le upu, o le paoa ma le mana o le Atua na faia ai mea uma o le foafoaga. A o le au popoto i le filosofia o Eleni, e masani i le mafaufauga lea, o le mafaufau o le "Atua, e na te faatonutonu ai le gasologa masani o le natura o mea o le foafoaga. O le fesili tele e fesili ai le aupopoto o Eleni, o ai o lo o ona pulea le gasologa masani o mea o le foafoaga? O le latou tali mautinoa lava, o le Lokou le mafaufau o le Atua. O le mafaufau foi o le Atua, o lo o nofo i totonu o le tagata, e avea ai ma tagata ola mafaufau lelei. O le avanoa lea o Ioane, ua ia folafola atu ai le au popoto o Eleni, ua leva ona outou pepese ma alaga fiafia i nei mafaufauga, o le mafaufau o le Atua, na faia ai, ma faatonutonu ai le gasologa lelei o mea o le natura, a ua outou le iloa lava ua afio mai le mafaufau o le Atua i le lalolagi i lona liutino tagata ia Iesu. Vaai ia Iesu, tou te iloa ai le mafaufau ma le poto o le Atua, ua tino mai i le tagata o Iesu.

O lo o outou alaga fiafia foi i o outou mafaufauga e lua ituaiga lalolagi. O le lalolagi muamua o lo o tatou ola ai, o se lalolagi matagofie i mea uma, peitai ua na o se lalolagi o ata ma kopi o mea moni, e leai se moni o i ai.

O le isi lalolagi, o le lalolagi moni lea, ua na o mea moni, tumau foi e faavavau. O le luitau mo tagata uma, pe faapefea ona ulufale i le lalolagi moni? O le tali a Ioane, o le ala lena o le liutino tagata o le Atua ia Iesu Keriso lona Alo pele. O Ia lava o le moni o le Atua ua afio mai i le lalolagi. Afai tatou te fia iloa le lalolagi moni, ia tatou vaavaai ia Iesu. O le faamalama tatou te iloa atu ai le lalolagi moni o i ai le ola faavavau.

O le feau lea mo tatou le fanau i lenei Kirisimasi. O le fanau mai o le Pepe o le Kerisimasi, o le Atua lava lea ua liutino tagata, ua afio mai i le lalolagi, o Ia o le Upu, o le Malamalama ma le mafaufau o le Atua, ina ia tatou iloa, o Ia lava tatou te ola ai, ma ola atili lava. Ia manuia le Kerisimasi ma le Tausaga Fou.

Uiga o Upu ma Fuaitau:

- i) upu - fetalaiga a le Atua
- ii) o Ia lava sa i le Atua - O Iesu sa i ai faatasi ma le Atua i le amataga.
- iii) pupula mai le malamalama – susulu mai.

GALUEGA FAATINO:

Fai mai le fuaiupu muamua Ioane 1: 1 – Sa i le amataga le Upu, sa i le Atua le Upu, o le Atua foi le Upu.
O le a sou iloa i lenei fuaiupu, o ai o faatatau i ai? Tau mai le mafuaaga o lau tali.

PESE: Pese ma Viiga 3

A'OA'OGA:

1. O Iesu o le Atua ua liutino tagata.
 2. Ua Afio mai le Atua e faaola le lalolagi uma.
 3. O Iesu le Malamalama o le Atua.
-